

棗

林

雜

俎

東林雜俎 聖集

科牘

貢額

明經

癸未禮闈三改

庶吉士四選

爭狀元遺戍

庶吉士再選

南宮傳代蒙宥

習譯監生

庶吉士三選及貢士外官庚辰齒錄

焚闈

翰林院秀才

庶吉士一年散館

寬貢士三科

鼎甲館課

戒場

爭解元占席

齒錄聘二氏

試規

鄉錄論表各二

會試錄序

附學生

羅萬化

辨李廷機失中三元

楚試不用詞林

割卷倖售

劉暹

巡撫監試

廷試策失塗注

管正傳

二甲御書

程策之誤

三甲進士刊策

鼎甲並相

劉珠

省試專遺

程策相目

韓敬

鄉榜填候

幣元

會試特點同官

首輔鄉人狀元

廢卷騰聲

丁丑鼎甲

馮士驛

萬年厯

南園謠

馮元龜

主考宴

進士歸娶

解元未娶

宗室進士

兄弟同進士榜異姓

進士同姓名

武生進士

進士異任

重舉鄉榜

原始

臚傳

試錄稱臣

六預鄉房

三氏學

學宮祀顏子

廣文變例

補榜

進士

先正流聞

宋濂攻苦

周壽誼人瑞

唐伯逸

鄒傑復姓

賈魯斥佛

遂宏言事

周魯章蓂莢

蔡新童婢

徐樞

于謙

李秉夢迎駕詩

尹恂

楊瑄

王恕

王存忠

楊守陳故宅

楊循吉定論

包德懷嫁故人女

周廷芳

陳恪冰清玉潔

邵寶絕巫

潘壘

劉大夏格言

李東陽佑歌

陳察御史騎驢

王勳嚇鬼

杜了翁言行

桑桂移風社

景暘孝感

鄭慶祛蝗

徐階論士

高拱知人

徐階李春芳陸樹聲

袁洪愈貧宦

沈思孝在戍

馮少墟規鄒南皋

魏庠廳旁塚

朱良有不受封

熊鳳文不踰選司

毛中丞里居

胡松抄書

王勅雲母

唐樞

張居正急才

姚弘謨迎母

余有丁家祭

戚繼光

申時行李庭機薄殯

李庭機鳩工

張臣感慟

唐文徵

顧憲成寡欲

鄭繼之

詹景鳳

葉向高講學

竇子偁

楊瀚

葛寅亮督學

朱國楨秀才氣

董其昌

李騰芳

王汝訓散貲

陳滄孝紋

衛一鳳辟狄

彭應參

許弘綱責子

吳道南

徐光啓

馮氏義僕

丁賓老不忘孔林

沈演四友二老

錢士升

陳組綬結客

張燁芳

柯起鳳不負丞

藝簣

論幼儒勅

顏子

偽書

王大令洛神賦

百家姓

大學本義稿

心史鉄函

道餘錄

陸夢龍

吳麟徵家訓

王朝堂死孝

宣尼遺筆

海鹽秦駢山始皇碑

嵇康真蹟

雲麾將軍碑

蘇子瞻制義

朱文公集

宋濂

御史試豈芽菜賦



周敘修宋史

蒲陽約史

張元楨

詩韻辨

張東海自題像司空圖

楊字陳

李夢陽論文

李夢陽何景明

江河伏流

常倫逸詩

王黃雲中歌

胡瓚

徐霖

前李攀龍

南京賦

兩皇明通紀

張邦奇

修誌

王道書壁雜帖

王慎中

國朝人物編

夏惟訥

唐覲

李于麟王元美手抄

李于麟閩史記

余翔

謝陞季漢書

無名氏詩

宋登春

陳于陞修史

喻應益

馮元成論文

陳植之

收書法

厄書

鍾惺譚元春

王元美讀書後毀論

穆文熙焚書

春雪詩

明雋

北雍刊史

爭詩

王穉登

周玄暉

中秘書

纂書

文瞽

洪範明義

蔣德璟日記

永和宮詞

失婢詩

續哀江南賦

爭妾詩

思陵長公主挽詩

廣孝錄

補盤骨行

棗林雜俎 聖集

鹽官談遷稿本著

科擧

貢額

洪武三年庚戌五月始詔行科舉直隸貢百人河南山東山西陝西北  
平福建江西浙江湖廣各貢四十人廣東廣西各二十五人若人才多  
寡不拘額時直隸就試者百三十二人拔七十二人見考官宋濂鄉闈  
紀錄序鄉試錄曰小錄河南通志是年鄉榜孫卓劉中趙斗南黃敬張  
堂王誼辛亥鄉榜張唯王輝李端張紳

庚戌辛亥壬子癸丑連歲開科有未及會試遂錄用者 金華府志

洪武四年吳伯宗榜六年金鑄榜十八年丁顯榜紹興府志按六年不  
開榜存疑可也

洪武五年鄉舉六年是科狀元莫考一云未嘗殿試徑照會試名次選授方澂王寅方毅俱進士興化府志

洪武十七年甲子三月詔貢士不拘額從實充貢

十八年乙丑科會元黃子澄狀元丁顯

衡州府志鄧偉奇才子安仁人乙丑會試第一上親製廷試策問以丁顯第一偉奇次之俱授翰林修撰偉奇天姿秀異博洽穎敏善屬文尤長於詩第二甲為編修吳文為檢討三甲楊靖為庶吉士是瑤為中書舍人或以陳安黃子澄為是科恐未深攷云

洪熙元年乙巳定南京八十人北京江西五十人浙江福建四十五人湖廣廣東四十人河南四川三十五人陝西山東三十人廣西二十人雲南交趾十人貴州附湖廣永樂九年辛卯雲南始開科時貴州未附宣德四年乙酉雲南貴州始合試增雲南五人共十一人貴州普安劉

瑄

宣德七年壬子雲貴共十五人雲南十人貴州五人

正統二年丁巳令貢士不拘額

正統五年庚申定順天仍八十人應天百人浙江福建六十人江西六十五人河南廣東五十人湖廣五十五人山東四十人廣西三十人雲南增三人貴州增二人共二十人

正統六年辛酉增順天二十人

正統十二年丁卯增雲南二人貴州三人共二十五人

景泰元年庚午詔貢士不拘額四年亦然

景泰七年丙子兩京各增三十五人浙江江西福建河南湖廣山東各增三十人廣東四川陝西山西廣西各增二十五人定雲貴三十人雲南二十人貴州十人

成化四年戊子增雲南四人貴州六人共四十人

成化十年甲午增雲南五人共四十五人

弘治七年增雲南二人貴州三人明年乙卯解額共五十人

正德五年庚午增雲南三人貴州二人共五十五人

嘉靖十四年分定雲南舉四十人貴州二十五人烏撒衛浦仲良第一

嘉靖十九年庚子增湖廣五人

嘉靖二十五年丙午增貴州五人

隆慶五年辛未增兩京各十五人

萬厯元年癸酉增雲南五人

萬厯二十二年甲午暫增順天二十人時選貢生增貴州共三十五人

萬厯四十年壬子增順天十人應天八人

萬厯四十三年乙卯增兩京五人浙江七人江西湖廣福建河南山東

山西陝西廣西四川雲南貴州各五人

天啓元年辛酉皆新增順天二十人應天十人餘省各二人是科山西宗生一人江西河南陝西宗生一人山東四氏學二人遼生一人不在正額

崇禎

明經

洪武九年貢諸生二十五歲以上

洪武十二年貢二十歲以上

洪武十四年貢諸生容貌端方者



洪武十七年貢歲貢年滿成效者禮部試中式入太學需用

洪武二十一年限府歲貢縣三年一考貢

洪武二十五年府歲貢二人縣歲貢一人

永樂十二年貢楷書諸生

宣德八年貢諸生四十五歲以上

正統十二年貢諸生四十歲以上

天順七年貢四十五歲諸生者

嘉靖十年令天下歲貢五人選其一歲貢通學考選至十五年止

嘉靖十一年令郡縣各開貢二年仍考選

天啓元年鄉試乙榜廩生准貢

崇禎元年登極恩貢

乙亥通考各學廩生拔貢一人

己卯鄉試乙榜俱充貢不論增附

甲申各學恩貢一人

弘光元年命鄉試恩貢副榜各輸餉百五十金准貢

### 癸未禮闈三改

永樂癸未以靖難渡江會試改八月天順癸未貢院災改八月明年廷試崇禎癸未以邊患改八月會試九月廷試

### 庶吉士四選

永樂二年三月己酉選庶吉士楊相宋子環王訓王直秦政學徐安吾紳彭汝器周忱劉子欽周文李寧張徹章朴歐陽俊盧翰梁任熊直王

道曹景暉陸孟良蕭省身劉孟鐸柴廣敬張宗璉田忠曾與賢洪鍾洪  
順余學夔陳滿蕭清劉紹林鳳張憲殷昂嚴光祖余順段氏李貞江鉞  
章敬倪維哲許瓊陳敬宗王仲壽李迪袁添祿李時勉楊槃並習文湯  
流王英孫奉余鼎李永年袁通周遠鍾旭彭禮戴弘演並習書戶部辦  
事進士當塗李衡以年少自請命改庶吉士同江甯楊寘習書

四月甲申進士沈升孫子良李昌祺羅汝敬徐敬蕭寘褚讓獨孤樂善  
陳士啓陳綱董鏞劉子敬陳伯恭陳資善趙曾趙濟劉綱尤儀劉澄黃  
揚俱改庶吉士修書

五月辛丑朔諸司辦事進士能書者曾慎魏騏吳惇添霄趙理趙玟韓  
庸史彬徐觀英靜曹彥昌陳旭田堉羅處富邢旭曾恕王宅葉貞陳興  
俞禮趙濬恭潘中徐聆胡秉彝周志義俞益曹睦楊儀鳳諱原性為庶  
吉士

六月命修書庶吉士獨孤樂善陳士啓蕭寬李昌祺羅汝敬沈升孫子良褚讓吳惇魏騏陳旭韓庸葉貞趙理徐聆留院辦事餘三十四人取選尚遠歸原籍

舊京詞林志

### 爭狀元遺戔

永樂四年丙戌莆田林環進士第一同邑庶吉士陳實自負其才疏取狀元不公上詔召詰之對曰臣百問百答遂命學士解縉撰百問策一道縉擬以聖門七十二賢賢賢何德雲臺二十八將將將何功為問及記里鼓詩上臨軒命林環陳實對試實對曰聖人之育才與王者之報功事雖殊而道則一也請試陳之昔孔子當春秋之否轍環不通乃欲以轉否之責博望諸徒故杏壇設科時則有七十二賢焉漢明帝承光武之統國家閒暇乃欲以教功之典激厲羣雄故雲臺紀績時則有二十八將焉收桃李於門牆列名姓於廊廟天下後世稱君道師道

之極者有以夫今以七十二賢之德言之顏閔冉耕雍子貢與夫冉有季路言偃商師其德之載諸孔論者無待陳矣自此之外去捷徑而私謁是戒持狷介而百結是甘有戒明原憲矣然遇事而不更其守貧賤而不移其心不有商瞿顓臾曹卨顏高者乎親賢以造君子領學而為小相有子賤子華矣然脫庸俗以游高明習禮樂以養性情不有梁鱣漆雕哆商澤冉孺伯虔者乎南宮适之所尚在德漆雕開之見道分明固不可及其他公孫龍后處或學君子或務自修壞駟亦樂效孔忠或道中庸或明家學其有得於聖教何如哉公冶長之非罪冉子季之四長固為可稱其他漆雕徒父鄒單榮旂或以操著或以才名公哲哀良孺原亢籍步叔乘或敬治己或惠及人其為聖門之傑出何如哉究孝弟以體悉聖心遭患難而能辱一致石作蜀有若巫馬期句井疆縣成其人也志不降而行不淪俗畧細節而守不詭隨申張罕父黨牢左

之邛其人也更寒暑而學不厭隨窮達而守如常孰若公夏首狄黑秦  
商顏之僕燕仇秦非焉仁孝修而貌如愚麤鄙變而志仁道孰若高柴  
公堅定鄭國樊須焉避叛兄而能潔遵善誘而德馨司馬材與顏子柳  
耳至於白茲容箴公西箴施之常其所以聯同姓而明臣道謂非斯人  
之徒與道可明而志不屈問詩禮而喜得三公與與陳子禽耳至於顏  
曾廉潔任不齊叔仲會邛異其所以履中正而挺高尚謂非斯人之匹  
與噫此聖教之所甄陶而為天下萬世之所崇祀者也復以二十八將  
之功言之滅羣雄除苛政與大斬將寧撰攻城畧地者固不乏人而其  
功之尤為特異者果為誰哉首建大策以光武為必可為鄧禹壯矣然  
鎮守河內使民生不苦於兵戈不有寇恂乎八戰八克以敵國為不足  
謀吳漢勇矣然安集關中致百姓相安於無事不有馮異乎折衝千里  
彎弓三百自古惟勇將能之而賈復蓋延匹美矣憂國奉公善待士卒

自古惟仁將能之而祭遵王霸克追焉耿弇決策定計而以勝算高天下固兵家之雄也而耿純陳俊料敵如神每出而成克捷之勳非中興良佐乎任光羽翼太平而以威望先士卒固當世之英也而却彭萬修運奇掌上逐鹿而樹萬全之功非佐命巨擘乎王梁杜茂應赤符而擊五校吳乃撫劍抵掌志驅伊吾之北者滅宮周武也岑彭姚期平西蜀而斬王郎矣乃善治鄣塞身負矢石之難者馬成堅譚也景丹傳俊李忠或收戰勝之烈或參帷幄之謀為功不同而其策立於當時者要皆從王事於有終者也朱祐劉隆劉植或稱汗馬之勞或展運籌之功所建不同而其効力於王國者要皆為社稷之翼衛者也然論者謂七十二賢中有秦冉顏何冉黨大三人者將以為是則德業聞望寂然無聞何與意者世殊時異傳記有所差訛故若存若亡如此耳又謂二十八將外有王常李通竇融卓茂夫四人者將以為非則并盡於臺一體崇

祀何與意者功非草創績在方來故推恩至此耳要之賢人君子何代無之而名世之出每待王者觀聖賢者慎毋以七十二賢為絕德當如宋邵楊程朱諸公庶無負聖教而得與夫崇祀之列觀雲臺者慎毋以二十八將為奇功當如國朝徐常沐郭諸公庶感動帝衷而得與乎畫圖之選者哉策上林環亦條答詳悉竟以廷爭違旨永戍邊衛實赴衛亡何卒二子繼沒時勿補到衛輒死累及旁支嘉靖間始開免福州府志

又實諸生時上官謁文廟屬實贊禮值大雨擬拜階上實高唱曰拜下禮也上官勉下拜已升明倫堂命講大誥以難之實曰此朝章當立聽上官竟不得坐

### 庶吉士再選

永樂四年三月癸丑選進士為庶吉士江殷胡啓先孫迪張叔豫李岳



潤陳孟潔張文選鄭復言曾春齡曹閻盧永黃獻及修書貢士朱紳  
復選進士黃安王資益黃信功黃所載鄭回趙圭陳夢京羅仲深邵輝  
吳文徐廷圭鄧成周煒陳實謝霖楊復王淪樂時逢劉本黎為庶吉  
士

南宮傳代蒙宥

永樂十年二月庚午會試末場貢士張彥昫余彝互傳代策御史送禮  
部請鞠治皇太子令翰林官閱其文平常宥之復監竣後科

習譯監生

永樂 譯字監生許應舉會試卷末仍譯書數十字場畢送翰林院  
定去取仍送入場填榜天順 以奔競革

庶吉士三選及貢士外官

宣德八年三月戊辰選進士尹昌黃瓚趙 陳睿傳綱黃回祖又乙榜

貢士龍文章瑾李滄梁蔡黃平陳詔田鈞李浦王鑑朱金宸和林同柴  
同恩張承翰陳康龔理相左黃興李奈王佐鄭觀胡如陽趙象蔣榮祖  
命改進士為庶吉士乙亥賜詩

十一月甲辰尚書舉義楊士奇楊榮郭璉胡濙選前科進士能文者係  
理賴世隆吳節李紹萬洪虞瑛潘洪玉王陳金劉寶鄭建方熙何宣為  
庶吉士學士王直教習

己酉諭行在吏部尚書郭選選外官有文學者明日奉引六十八人命  
楊士奇楊榮試之 知縣孔友諒進士胡端楨廖莊宋璉教諭黃純  
徐維超訓導婁升改進士為庶吉士

### 庚辰齒錄

天順四年齒錄閣臣許彬子起刻兄越奎文閣典籍  
進士仁和汪諧齒錄書父仲淵蓋極刑諱其名也

焚闈

天順癸未禮闈火貢士焚死百十人並賜進士諭祭吉水羅狀元倫常熟徐侍郎恪俱若有人提出之者餘杭葉御史稠夢神告以衷緋而入及濱危吏卒謂緋者官紳也果救免

翰林院秀才

成化丙戌科榜眼休寧程敏政

丁未科進士眉州歐鈺

庶吉士一年散館

成化辛丑科庶吉士明年壬寅八月辛丑李東陽倪岳謝鐸焦芳陳音授編修吳希賢授檢討劉瀉改中書舍人張敷華等九人俱主事

寬貢士三科

弘治二年乙酉九月己卯貢士林潤以會試三黜故事禁入試請寬明

年特許一科

三年庚戌十二月甲戌弛貢士三科不試之禁

### 鼎甲館課

弘治壬戌科選庶吉士併修撰康海編修孫清李廷相俱課書命學士梁儲王華教習先是天順四年三月丙戌選庶吉士劉健等十五人并修撰王一夔編修李永通鄭環命學士劉定之侍讀學士錢溥教習先後鼎甲不課萬曆壬辰後選館概課鼎甲不出序

### 減場

正德甲子科四川解元周洪謨

丁卯科福建解元陳俊初場俱五義

### 爭解元占席

正德庚午科山西解額陳皋謨第一沁水常倫次之方鹿鳴宴倫厓階

而升請與舉謨角主司慰諭占席乃退明年辛未倫成進士授大理寺評事以酣狂謫壽州判官仍故態扶於臺使棄官後服除起寧光州守不赴已謁選騎出歸德舞雙刀陷淖中伏刃死年三十三亡子倫醉即矢口成詞邑妓孔留性敏記立被之絃索隻字不遺今澤潞間所傳樓居子樂府得之孔留

### 齒錄聘二氏

正德戊辰科探花莆田戴大賓寅仲原聘高氏太監劉瑾強以兄女字之齒錄刊聘高氏劉氏大賓奔母喪道卒劉氏嫁關中士人坐瑾黨削籍

### 試規

宋制大比之歲每州皆有貢院本州士子皆得入試 明朝先以監司選擇之乃以入試景泰以後專委之提學憲臣

嘉靖初會場禮部條約許舉子帶洪武正韻一部表末時不用瞻天仰  
聖是重穀碧里雜存

科場舊規正考閱易書二經副考閱詩春秋禮記三經各不相涉見詞  
林典故

### 鄉錄論表各二

嘉靖七年戊子科江西主試

羅

刑部主事屠應璠鄉試

錄刊論表各二篇名雖舉子仍分注羅撰屠撰

### 會試錄序不受門生

嘉靖己丑科會試錄後序霍韜撰略曰我百執事知所以事君乎賢才  
社稷之祿也聖主求才為社稷也吾臣子貪以為功得罪社稷孰大焉  
是故多士進矣 聖天子不用為私用我百執事其政曰士錄我進為  
吾門生市私恩乎又曰爾多士進矣服事庶僚鞠躬誓心下衛民生上

衛社稷圖報 聖天子為帝臣公臣母德舉主偏曲河北以獲戾社稷  
是爾社稷之臣也其慎諸於戲其慎諸

正德甲戌科霍韜會元於座主不稱門生

萬曆乙未科吏科都給事中

楊東明分考不受門生

三甲進士刊策

嘉靖乙未科進士安陽郭樸第三甲出身 上善其策命鐫於一甲後  
附學生

甯國府志嘉靖十五年知府李默著載附學生罷百人宣城八十人南  
陵涇太平各七十人甯國三十人旌德四十人又泗州志嘉靖初侯定  
訓著盱眙附學生僅三十人乃晏子弟可百人數之明年夏補諸生三  
十五人餘督教如舊以兩地觀之往時附學生猶寥寥也

鼎甲並相

嘉靖壬戌科一甲申時行王錫爵余有丁  
萬厯丁未科一甲黃士俊張瑞圖施鳳來

丙辰科一甲錢士升林鈺賀逢聖以上俱入相壬戌固極盛而丁未諸  
公頗有遺議士升丁酉歲選太學久不售考選例當縣丞而止乙卯舉  
北雍聯捷躋於政府

羅萬化

廷試策進呈必書法潔整隆慶戊辰科閣臣進呈 上疑首卷有私於  
二甲卷 得羅萬化真第一其卷書法多塗抹

劉珠董又辛

公安劉珠惟明嘉靖丁酉貢士困公車三十六年每下第輒投執友江  
陵張太岳詩始知相府深如海不使山人醉似泥又相府勛名青鬢少  
故人心事白頭多隆慶辛未科年六十六成進士珠上太岳書欲知座



主山為壽先看門生雪滿頭

萬厯乙丑科睢州董入莘時年七十思南京大理寺御年殆九十視復無恙

館試斥落

正德十二年丁丑進士睢州劉淮考館試卷風吹過五鳳樓南御河邊尋得楊閣老將卷面批不謹二大字遂不取

冒籍

令甲嚴科場冒籍按宋科場嘗二年一開或四年三年一開天下舉人多就開封府寄應徐節孝先生曰二年一開不若使各路轉運司類試總一路解額解額既廣則人皆便之是可以革寄應之弊也

辨李廷機失中三元

李九我隆慶解元主考瑤泉申少師即留為館賓轉館於歸寧重宗伯

家癸未李得會元申正當國宜以狀元予之續高文毅之盛乃拔朱養  
淳國祚第一李君居二有意乎無意乎二公皆清正未可甲乙也太  
頃薄懂小品按癸未廷試申文定以子用懋入試避讀卷則文肅所著  
殆未之致也九我貽弟後見秀水頗快快一日秀水疾九我過候坐榻  
推窗庭松蟠屈笑曰弟嘗夢歷此景或云功名在是今得之矣名次兄  
後非豫兆耶自是懽洽無間

### 省試專遣

萬曆乙酉始遣京官主試各省舊主副俱教職由監試御史所聘藩司  
提調臬司監臨彌封謄錄受卷官皆有司例得閱墨卷有所議拔廉內  
毋敢違也自朝臣專遣內簾始肅又  
巡按御史邵梅墩 監  
試江西令內外簾並用硃卷

### 楚試不用詞林

萬曆甲午科禮部推湖廣主試翰林院

吏部左給事中葉

繼美 上除翰林竟點繼美另用工部主事莊懋華

程策相同

萬曆丁酉科洗馬鄒德溥擬南京主考其寓邸乃霍文炳故居害金若干坎之為巡城御史況上進所劾免官因以所撰策一道貽南京河南主考俱故人也竟以雷同被給事中劉道亨糾之南京主考左庶子朱國祚右中允葉向高河南主考尚寶司卿蔣春芳戶部主事李長庚

割卷倖售

萬曆丙午科山陰監生鄭汝鑽舉順天第四人本僂游選貢馬顯忠卷割贖倖售事覺監試御史李楠順天府丞題請顯忠補額禮部謂無例且末策非其策而止

韓敬

歸安韓敬嘗師事宣城湯太史賓尹萬厯庚戌湯分考搜鄰房拔敬會元時方忌湯遂見攻者衆敬免官終身不達彼其才自足博一第惜以主司累也

### 劉暹

庚戌分考諭德趙師聖得會稽劉暹卷薦第一主司嫌首義過奇抑寘第六趙固執不可遂冠乙榜謂來科必元暹終不第言及輒墮涕萬厯癸卯江浦趙體敬丙午長洲陳元素俱擬鄉解不果

### 鄉榜填改

萬厯壬子科四川第六名王應熊誤填周繼昌放榜後 推官楊一鵬檢舉御史彭端吾以聞有旨改正繼昌走訴京不許主試兵部員外郎張應徽大理寺評事陳曰庭各罰俸二月先是戊子八月南場分考當塗知縣德清章嘉楨填榜四十九名詩經荒字十號 誤填春秋

荒字十號曹祖正榜出尋檢舉應天府尹張楨等遂未進試錄奏上祖  
正除名嘉楨奪俸五月詩經卷解部覆閱

### 巡撫監試

鄉場監試例巡按御史或偶闕如吾浙則改巡鹽御史萬曆乙卯貴州  
巡撫都察院右僉都御史張崔鳴代監試

### 會元

萬曆丙辰會元吳江沈同和係倩筆首義又湯賓尹舊刻也放榜日一  
蒼頭喜甚即曰吾家中一會元又多一會魁同邑觀榜者即拉問爾一  
家安得兩捷乎即詰責被掠微吐其情亡何事敗升革第六名趙鳴陽  
長安以骰子戲日斷公絕六

### 廷試策失塗註

萬曆己未科會元莊際昌廷試策偶悞筆以塗註不便進呈例任之果

第一其後論者謂醵勞不辨之狀元遂回籍讀書蓋忌方相國從哲借  
訐之也崇禎辛未狀元陳于泰策陽陽悞易易榜眼吳偉業策唐之礦  
騎礦悞驥上俱手改丁丑會元吳貞啓對策亦悞筆同年包爾賡戲  
之曰兄又不辨字狀元矣

### 會試特點同官

天啓壬戌科閣臣推何宗彥顧秉謙主禮闈上點宗彥忽及朱國祚  
非所推也顧以是不懌疑秀水有他故後秀水捐館擬謚文懿朱公子  
爭之得謚文恪

### 管紹寧

崇禎戊辰狀元閣擬武進莊應會上閱卷不懌遽拔其次抽餘卷得  
管紹寧策內誠字欠一ノ上問閣臣云何對曰聖意果可點畫何礙  
上遂加一ノ真第三紹寧因號誠齋

首輔鄉人狀元

辛未狀元宜興陳于泰為首輔周延儒表弟故事會元策另封有二錦衣官問知太倉吳偉業也另封兵閣擬于泰偉業及夏曰瑚第一甲上如之御前拆封首輔高聲曰第一甲第一名陳于泰常州府宜興縣人不覺汗出浹背辛 上不問偉業謁周周曰以吾當國而拔宜興人狀元天下其謂我何又語于泰曰事有不辨而自明有辨之而後明今吾弟首臚雖辨之誰為明我者先是周買陳氏宗人宅毀其家廟陳氏攻之實非有私也于泰佯誕亦不執師弟禮

二甲御書

甲戌二甲第一名李昌系 上硃筆蓋鼎甲御書餘閣臣定之時首擬武進陳組綬宜興吳國華次之 上不嫌嘉善錢相國搜卷得杞縣劉理順條對詳瞻但多訛字 上手訂焉拔第一

廢卷騰聲

崇禎丙子南場分考尹明興聞廢卷麓中有聲即檢閱仍不錄其聲加沸再檢再廢麓聲如初忽卷躍麓外尹異而拔之則無錫高世泰也見世泰問其何德世泰無對同年包爾庚問之曰向不二色

程策之悞

崇禎丁丑會試程策有云世宗之時外有火節僉答之內有鄧茂七劉六劉七之寇夫火節在成化時鄧茂七在正統末劉在正德中誤甚

丁丑鼎甲

崇禎丁丑廷試閣擬海寧陳之遴無錫高世泰廣昌劉大年前列常熟趙士春吉水劉同升則二甲及讀之遴卷上不出一語讀大年卷色忤讀同升卷云陛下何負於諸臣哉諸臣員陛下耳上善之拔第一次之遴士春二甲首世泰



馮士驛

吳縣馮士驛善春秋屢困場屋貢禮部宜選司理崇禎乙亥或勸之應北闈果豫薦丁丑有孝廉來候知其馮姓曰足下今年必第矣叩之曰吾三年前寓此舍夢有人推我去云此馮進士寓所也足下適合之矣果成進士

萬年厯

崇禎庚辰科 上嘗閱萬年厯相傳姜太公著唐李淳風注每朝各四句 本朝末句 魏蘇困注魏氏蘇其困也廷試後召對諸貢士通州魏藻德敷奏稱旨拔第一尋超拜相 藻德初名 嘗有鬼自後呼之曰藻德因改名

南闈謠

崇禎壬午應天榜宦室七十餘人謠曰不要古文不要時文只要松文

不用孔子不用孟子但用公子是年相傳此榜後不復試士果然

### 馮元龍

癸未進士慈谿馮元龍被召對上曰天津巡撫於爾何人曰胞兄也  
又問五經中者爾何人曰臣胞弟

### 主考宴

兩京主考惟順天主考賜宴本府會試主考賜宴禮部

### 進士歸娶

洪武十八年乙丑科探花仁和花綸

永樂己丑科榜眼定遠苗表年十九

永樂乙未科探花閩縣陳景著年十八

正統乙丑科吳縣劉昌長甯周洪謨

正統戊辰科榜眼長洲陳鑑年三十四

平越黃紱懷安謝琚博野劉吉襄陵邢讓俱年長

景泰辛未科繁昌吳琛年二十七

成化丁未科狀元鉛山費宏年二十

弘治壬戌科海寧許元奎年三十信陽何景明年十九

弘治乙丑科榜眼會稽董玘年十九

正德戊辰科探花莆田戴大賓年二十丹徒唐鵬信陽戴冠弘農王言

正德丁丑科探花南海倫以訓年二十

嘉靖癸未科探花華亭徐階年二十一涇陽秦世顯錢塘孫繼魯

嘉靖丙戌科會元趙時春年二十

嘉靖己丑科荆門羅博晉江蔡克廉梁懷仁歙縣程尚寧鄞縣陳東

嘉靖乙未科晉江周天佐渭南薛騰蛟浦城周鳳岐

嘉靖戊戌科南海馬拯盧夢陽興化陳應魁莆田林茂植宣城杜拯濟

南張潛餘于李春芳

嘉靖癸丑科曲周楊一鷄峨眉荀廷庚龍游陸瓚

隆慶辛未科慈谿孫成名錢若賡高平劉虞慶

萬曆丁丑科平湖陳泰來

萬曆庚辰科南靖吳宗熹番禺謝典思

萬曆癸未科永春李開藻

萬曆己丑科定襄傅新德晉江林欽棟同安蔡復一漳浦吳采

萬曆乙未科羅山劉尚朴江陵朱光祚臨晉荆養喬

萬曆戊戌科成安王象瑞晉江林喬相進士歸娶容攷某科

萬曆辛丑科象山史起龍

萬曆甲辰科南海李侍問

萬曆庚戌科昆明傅宗龍東陽趙明欽

萬曆癸丑科狀元宜興周延儒

萬曆丙辰科德清蔡奕琛

萬曆己未科武昌彭祖壽

崇禎戊辰科宛平金鉉

崇禎辛未科榜眼太倉吳偉業

解元未娶

吉水解 縉 年十七

涪安商 輅 年二十

吳縣劉 昌 年十九

長寧周洪謨 年二十六

金州蔣 冕 年十五

慶陽李夢陽 年十八

南海馬 拯 年十七

銅陵余毅中 年十七

定襄傅新德 年十七

浙川全 燧 年十九

宗室進士

宗室鄉舉始天啓辛酉科

宗室進士始天啓壬戌科

朱慎鑒

崇禎戊辰科新建朱統鈺列輔國中尉選翰林庶吉士改中書舍人給假三年奏復館員歷國子祭酒

甲戌科新建朱統鉉初名寶符侯輔國中尉

華陽朱奉鈞初名鈞皆庶宗未請名至是改登玉牒奉鈞侯奉國中尉

丁丑科新建朱統鎮輔國中尉

澤州朱允鰲輔國中尉

庚辰科祥符朱朝瑩

癸未科南昌朱議汴原封輔國中尉

南昌朱統鎬

稷山朱鼎姿

陽城朱廷曙

兄弟同進士榜異姓

萬曆丁未科進士江甯徐鳳彩余大成同胞兄弟大成出繼外祖余氏

進士同姓名

永樂乙未科兩葉恕

宣德庚戌科兩王復

正統丙辰科兩李春葉景壽

正統戊辰科兩張瑄

正統辛未科兩楊瑄劉璋

天順丁丑科兩王道

成化丙戌科兩徐森

成化己丑科兩鄭宏

成化壬辰科兩洪漢

成化甲辰科兩王溥

弘治癸丑科兩曹瓊

弘治丙辰科兩王言

弘治壬戌科兩魯鐸

正德辛未科兩王璽

正德辛巳科兩王朝用

正德丁丑科三張淮

嘉靖丙戌科兩張守約

嘉靖壬辰科兩高節

嘉靖戊戌科兩章煥

嘉靖辛丑科兩陳善



嘉靖乙丑科兩陳王道王三錫李學詩

萬曆丁丑科兩楊起元

萬曆甲辰科兩張銓一大名人永樂司參政一沁水人以御史殉

遼俱乙亥正月二十八日生科第子女皆同亦一奇也參政前守交州有登岱詩後姜士望使君重沁水勒詩於石不知其悞

崇禎丁丑科兩陸自巖

崇禎癸未科兩王曰俞

武生進士

工部尚書劉麟廣西按察副使楊成俱武生第進士

進士異任附鄉舉

松陽王景科進士

程宗官翰林編修

成增官

俱闈為內侍

成化壬辰科進士

黃讓官工部主事削籍善醫後除太醫院判

成化辛丑科進士江寧梅純以定遠知縣免歸改襲孝陵衛指揮使歷

中都副留守

隆慶辛未科進士宋儒以貴州土官子冒籍定州選庶吉士改禮部主事坐免襲麻哈州土同知

天啓乙丑進士安岳張任學以監察御史巡按河南求改武階討賊遂改軍都督府署都督僉事河南總兵官

建文元年河南解元祥符張信以兵部右侍郎改錦衣衛指揮同知終四川都指揮使

景泰元年山西貢士澤州侯爵以父璉征苗功襲錦衣衛正千戶成化貢士王宣龍襲武功左衛指揮僉事

弘治己酉福建貢士楊瑛以虹縣訓導襲汀州衛指揮同知

四川貢士青神余寘以父子俊軍功襲錦衣衛正千戶

隆慶元年丁卯福建貢士蔡夢說龍巖所千戶

又閩縣林觀事 文皇於潛卽累功至錦衣衛都指揮僉事嘉其爲寶  
命署禮部郎中奉使朝鮮 仁宗卽位勅鎮陝西宣德初召還仍掌衛  
事以金吾署文部尤奇

### 重舉鄉榜

洪武癸酉科吉水曾秩舉江西鎖榜同輩請之改名高乙酉又儒士盛  
科矢志不仕

永樂六年侯官鄭瑛以儒士薦應天癸未進士坐違例謫武當山督役  
至十五年丁酉復薦湖廣

景泰四年順天解元盧陵羅崇嶽冒香河籍被革丙子復舉江西丁丑

進士歷兵部郎中

仁和汪諧歲籍順天舉景泰癸酉科被革還浙舉

成進士歷禮部侍郎

會稽陶大順歲籍順天舉嘉靖癸卯被革重舉浙江戊午科成進士歷副都御史

萬曆乙酉科北榜餘姚胡正道冒籍革辛卯改王國昌舉南榜官郵縣教諭

又洪武三年詔開科內云仕官已入流品及曾於前元登科并曾仕官者不許應試而是年福建鄉榜閩縣陳信林文壽並元進士再中式信之懷安學文壽長樂學建文元年福建鄉魁第二人莆田林泰元閩縣知縣夫建文初扞詔容有之開國始事不應沮格殆不可曉

優免廩生

舊制廩生斥退者仍追廩米甚苦之成化九年北京提學御史閻嵩錫引考察斥官為比免追從之

### 莆田科甲之盛

莆田自洪武庚戌至嘉靖戊子凡五十二科鄉舉千一百一十一人甲榜三百二十四人狀元二人探花四人會元一人解元二十五人宋時進士九百七十餘人諸科特奏名凡六百四十餘人大魁五人宰輔六人

### 原始

鄉報急足始嘉靖

其昔舉子自備青袍後官給不知所自 選歷

科程墨始萬厯庚辰錢塘錢穀穀號豐寰膺貢官曲靖知府 會試房刻始萬厯壬辰

### 廩傳

鼎甲臚傳訖出長安左門京兆候迎謝恩畢宴堂上南向京兆北向席

特盛用太常樂仍謝恩出京兆送歸私第茶別狀元同鄉宦京朝者例  
邀京兆燕之榜眼探花不預故事御批一甲三人卷用上管筆拆卷在  
中極殿左

庶吉士到院閣臣送入錦衣衛寘宴亦太常樂

### 程錄稱臣

鄉會試錄序皆稱臣外省則否以兩京筆下外省則考官所自序也萬  
厯初上摘此以問閣臣欲罪之江陵具言其故乃止後各省錄序俱  
稱臣

### 六預鄉房

武昌教授陳觀子潮永樂丁酉應天分考癸卯及宣德丙午預考江西  
福建調荊州又預考江西福建正統辛酉又分考應天凡六預鄉試

### 三氏學

國初立孔顏孟三氏學設教授司教授一學錄一學錄即孔氏裔為之  
正統甲子始命宗生聽學使考入棘成化元年許三年貢太學

### 學宮祀顏子

兗州滋陽縣儒學祀宗聖顏子之神與天下各學不同 陋巷志

### 廣文變例

天啓丁卯杭州府教授饒曰梧求計偕教授從九品例不會試曰梧謂  
初受秩吏部給達現在也上官不能奪會被劾去

崇禎癸未八月許應天府教授晉江何九雲會試俄登第

### 補榜

崇禎庚午浙榜仁和尚觀法法字填補向未有也初潘生館尚氏冒姓  
尚觀升補諸生是年同雋主考黃道周嫌其昆季以觀升改觀法觀升  
走訴京師觀法除名先是隆慶庚午山陰諸葛一鳴讀書山中見人展

一牘云天榜也問以己名曰爾在下科一鳴求增入許焚楮幣虔謝果秋捷謂前事誕不足信又計偕見前人曰若累我家遺失一鳴不聽禮聞懷挾被革事相去一甲子適相類觀升少年誕肆筵困有司遠憶悵不自得以死

### 進士

進士不可太少不可過多太少則雄州劇邑不能充而無所彈壓過多則不相貴盛而塞舉貢之路嘗見鄒孝如著議以為甲乙不甚相遠請每歲鄉試計偕即奉廷對間擇其甚淺鮮無當者置之使仍就鄉試而其存者即盡以甲次授之官庶幾用其盛銳之力不使疲精神於帖括無用之技且使上不以資格待士而彰瘴明士不以資格自負自泥而驕怠不作又可以省公車數萬之費其論博矣然士子學有深淺才有高下譬諸草木區以別矣甲科之設所以廣厲鼓舞使天下之士精進



勉力而不能自己前人立此良有深意周禮命鄉論秀士升之司徒曰選士司徒論選士之秀者而升之學曰俊士曰造士大學正論選士之秀者以告於王而升諸司馬曰進士王者豈故為是繁縟哉重爵祿辨官才如不得已用人之道也士取其秀豈專盛銳哉今之諸生即秀士也應舉者即選士也舉於鄉者即俊士也進士即升諸司馬者也進士之名來自成周定自祖宗惡能廢諸盡請以後會試每房取正榜十人再取乙榜二十人正榜合之一百八十人乙榜合之三百六十人正榜則上親試而分三甲仍照選資乙榜則請以六十人任州以二百人任縣以百人為博士長其京官則盡以陞任不以初除凡揀選就教等項一切除去舉人五科不第皆不得再就試乙榜有不願就者錮之終身此汰比之孚如所議庶幾不甚扞格焉時可

先正流聞

宋濂攻苦

宋潛溪先生集有送東陽馬生序云自幼嗜學家貧無書每假借藏書家手自筆錄天大寒研冰堅手指不能屈伸弗之怠錄畢走送不敢逾約既冠趨百里外從鄉先達執經問道先達德隆望尊門弟子填屋室立侍左右俛身傾耳或遇其叱詫色愈恭不敢出一言俟其欣悅則又請當其從師負篋曳履深山巨谷中窮冬烈風雪深數尺足膚皸裂不知也至舍四肢僵勑媵人持湯沃灌以衾擁覆久乃和寓逆旅主人日再食無滋味之享同舍生皆被綺繡戴朱纓寶飾之帽腰白玉之環左佩刀右佩容臭煒若神人而已緼袍敝衣處其間無忤色云云噫先生攻苦如此讀一過寸陰勤渠凜凜在目

周壽誼人瑞

高皇帝召耆老謁見崑山周壽誼居首年百十六歲賜宴及鈔幣接壽誼生於宋而鄉飲於洪武六年其六世孫震正德中令鄱陽出人瑞卷士大夫題咏盈尺上海陸子淵先生深以編修使饒跋其卷曰三代而下惟宋失天下為無罪惟元興最為事變嗟乎能夷人數百年宗社於強弓健馬之間而不能禁一老坐觀其子孫之復觀天日何其快也若壽誼公之壽足以繫興亡之故豈淺鮮哉且手挈華夏之禮以還華夏之主於克華夏之日何其奇也公六世孫震字世亨以名進士筮仕鄱陽令嚮往未艾是能輔毘華夏之道以昌公之世者則又不獨為壽而已矣世亨其懋之哉

### 唐伯逸

南昌監生唐伯逸洪武七年任仙居典史嘗謂取民財如取鷺鷥股上肉誠心愛民一塵不滓

仙居縣志

鄒傑復姓

洪武九年六月 科給事中鄒傑於東閣奏臣祖孫福謙陝人也出守  
嘉興元亂航海舉家溺於登州臣附餘板得活傭於登人鄒義時年十  
四養為子冒其姓今貢成均進用乞復姓孫氏許之諭毋忘鄒氏

賈魯斥佛

廣西宜山賈魯洪武辛卯貢士授崖州學正改瀘州性不喜浮圖訓子  
綱為輩皆儒業諭以沒後當依家禮毋作佛事否則必禍汝後魯卒子  
迫於姻黨召僧設齋事訖焚楮忽飛煙焚其室平樂府志

遂宏言事

錢塘遂宏弱冠時以郡諸生言時政得失 上說之試秋柳賦稱旨賜  
歸後選貢終松江訓導錢塘縣志

周魯章蓑笠

新喻周魯章文瞻洪武末舉明經召為選部主事不就 上賜褒苙令  
歸教民稼穡因號明農隱逸 臨江府志

### 蔡新童婢

崇德蔡新父為人醜死新誓報奮擊之下獄十三年家童阿小年十五  
禿髮稍識書額天求白主寃積麵作餌携之乞食至京擊登聞鼓歷十  
三疏始得白初阿小北去家僕婢二人謀逸婢攘臂曰主母焚焚恃吾  
二人若可去吾當終事之日刈草二百斤半供紡半曝之待風雨即孝  
女不啻也永樂癸卯新舉於鄉官臨淄令厚贍其婢年至九十二 崇德  
縣志

### 徐樞

松江徐樞叔拱太醫院判宣德元年省墓 上閱其老詔出官人陳氏  
偕內官陳福袁亨給事明年致仕後沒三人皆從葬

于謙

于少保有寄內弟書云薄俸五錢

地師某云少保祖墓當奇貴不可言少保即馳書其子令遷葬另一緘  
俟遷葬訖啓視子冕得書移葬如命始啓緘則述地師事也不半載遭  
禍今書稿藏於家 張元此說

李秉夢迎駕詩

土木之難李襄敏從征脫歸進戶部郎中夜夢作詩送楊鴻臚善迎駕  
天恩寵渥作鹽梅迎復上皇出紫臺羣潛跡歸朔漠六龍回駕入  
蓬萊明日以語同官次年八月而驗 曹縣志

尹恂尹直先

尹相國文和直作兄恂墓志銘云以靖州衛吏任順天湯山草蕩大使  
廣東坦岐巡簡司巡簡成化元年正月十六日禦死夫尹氏歷城人

吏賤役必遠隸靖州又最下秩且戰沒不求卹先輩雖穹貴于戚屬無私厚其戚屬亦無望其私如此今纔入科第戚屬借粟監例貢輒思承倖京幕羞以吏進矣故錄之以存古道

楊瑄

浙江按察使楊瑄豐城人成化中築海鹽捍海塘堅壯有碑不存邑人仇俊卿曰昔呂梁碑磨泐可認者止三十六字人皆惜之想見禹功而楊公之勒一字無存感更為深自不能泯當知繫人心者不在碑之有無萬厯乙亥僉事晉江陳詔來修塘入楊公祠不揖背像而坐亡何詔口作公語曰我堂官也汝敢無禮我將殺汝尋疾作禱之始愈

海鹽縣志

王恕

王端毅冢宰日有御史李興巡按關中酷刑殺人至三原斥公名而詈

之後罪人多罪當大辟又御史韓雍值點郊齋入部堂中道呼公名時  
議輕薄當斥公奏興雖酷無私可免雍直而有才可超遷從之詞崔銑洎  
端毅配蓋夫人繼張氏文氏並贈一品夫人按成化四年南京御史楊  
智等劾南京刑部右侍郎王恕不顧名節託本部郎中黃紱娶故劉指  
揮妻文氏為繼室云云夫以端毅之賢言動不苟臺屏風間斷不足信

### 王存忠

仙居王存忠成化丁未進士歷御史知府無錢市靴詩云分付兜  
曹休指望好將芒履印蒼苔其清苦如此仙居縣志

### 楊守陳故宅

楊文彞故宅在鄞縣南二十里鏡川初未登仕至公兄弟俱顯接籍蓋  
七人有野史獻詩曰昔年曾向此中過門巷幽棲長薛蘿令祖先生方  
振鐸賢孫學士未登科將軍曹氏墳連壟賣酒王婆店隔河今日重看



新第宅煙波緩棹聽絃歌公嗟賞不已謂史曰此詩誠吾家傳也當珍藏以貽後人欲厚幣酬之史固辭而卒

楊循吉定論

楊南峰先生作子胥鞭屍論夜聞山中鬼哭曰腕可斷筆不可改

包德懷嫁友人女

蘭谿通判鄭權溫卿記鄉先達包侍郎德懷在京與同鄉胡主事文善主事疾革往訣主事止一女以託侍郎曰諾既主事與妻相繼沒於京即侍郎抱歸其女囑其妻育之如己女後女長擇婿祝氏將嫁侍郎居與主事相去二十里其故宅猶在乃先令人以竹簞分隔其廳事為三間已處左妻與女處石中設主事神位至日備祭告嫁事命女拜已侍郎長號慟哭然後行聘遣嫁奩具皆備

金華府志

周廷芳

蘭州周廷芳小泉字敬卒也一日讀大學有悟遂究五經篤信力行恭順侯吳請教其子對以往役則可往教則不可志節高峻言不空發

呂涇野集

### 周鑑

周鑑字孔明麻城人正統乙丑進士授御史出按江西有大學士陳循子不法鑑論之死還雲南副使九年不遷鑑所至汰墨理枉仍開寶泉壩積水溉田多至數萬頃後考績入京行江中舟覆幸亡恙陞山東按察使致仕還鄉鄉人布政李正芳僉事董應軫並有雅望邑令立耆老堂凡大事輒咨此三人也

### 陳恪冰清玉潔

歸安陳大理恪以方伯家居歲歉餽粥不給薦者謂冰清玉潔孝宗題此四字御屏

邵寶絕巫

無錫邵寶國賢知許州弘治癸丑五月鄭州某鎮地陷若干丈水溢民爭攘之六月許州小趙鎮有巫言龍骨出土中誑言禍福邵以惑衆毀其骨督學江西携試牘歸家久而紙故穴地瘞之

吳翰詞

吳翰詞字子修應山人嘉靖庚戌進士知棗陽縣清約節愛不附權勢民愛之拜御史任事不避艱險按雲南風采卓然當是時嚴嵩勢張甚御史報命不勝賂翰詞遂乞告杜門結友性耿介方直一介不苟燕居整肅宗人亦不敢近舊居數椽比卒斂以敝緼今棗陽雲南皆有祠

潘壝

淮安潘中丞壝 丁卯舉於鄉郡守趙公俊書聯取功名富貴屬對壝舅氏少司寇虛齋葉贊過而見之歎曰纔出門便教以功名富貴壝

聞教悚服

蔣信

蔣信字卿實武陵人諸生時貧甚郡守憐之令捧詔屬邑例得津贈信却之王守仁龍場之謫道武陵從學然自有所見不盡主其說貢南雍祭酒湛若水俾主諸生教事嘉靖戊子舉南榜壬辰登進士歷官兵部員外郎四川僉事貴州提學副使以征苗捧檄即往湖北議兵餉不及辭御史謂擅離職削籍歸不問生產闢桃園精舍與郡中子弟講業其教人大抵主慎獨篤倫修行明理通世務在桃畧十八年年七十七卒臨終賦詩歸去桃畧十八年歌游多在萬桃間萬桃於我浮雲耳願借西風吹上天投筆而逝世稱道林先生所著粹言若干卷

劉大夏格言

劉尚書東山先生曰財貨須務農服賈凡力得者獲用其餘易致之物

終非己有子孫視之亦不其惜况官貨悖入者乎

### 李東陽佑歌

李西涯飲陳都憲德卿魯司業振之邵太常國賢崔郎中世興何郎中子元等酒半李曰國賢吳人振之楚人間皆善歌歌以相和可乎遂出近詩數十首俾歌之陽春堂集

### 陳察御史騎驢

常熟陳察明遠任御史按蜀乘驢布按皆跨馬減其驕從按御史出巡舊騎馬後乘輿不知起於何時或成化後事浙有舉子王化大帽見按臺某某呵之問所起對曰即起於大人乘轎之年

### 魏庠鑪旁塚

崑山魏庠子秀紉資任光祿寺典簿其廳事旁有荒塚邑令郭楠造而問故對曰其子孫欲售之久矣予之直彼不以治生而棄骨於水火故

竄存之令歎曰杜氏之葬在西階古人之義也不意今日復逢於君咨嗟良久而去歸有光集

清吏張守約

張守約字彥博岳州人嘉靖丙戌進士知華陽縣歷崇德遷南評事寺正擢知淮安淮安素難治守約遣孥歸單車携二蒼頭之任闢園植蔬自奉儉約禁絕官市常俸貲之帑間出以賑困乏性嚴峻蓄家人少恩二蒼頭日啖脫粟數合鷄衣拮据憤恚不得逸一日乘守約寢刺殺之僚吏聞變急來視守約息僅屬瞑目語之故遂死儉所遺惟二敝篋篋中書數束敝裘敝襲而已衾褥惟幄咸綴浣汙裂靡堪御者二蒼頭竟伏法

朱良育不受封

吳縣朱良育積學不第膺歲貢子鴻漸進士官主事貤封不受竟明

經

杜了翁言行

廬山老儒杜了翁

曰道在論語言忠信行篤敬求之四十年未有得或曰道豈言行盡耶曰言行君子所以動天地也若外言行而講道吾不願聞時王陽明先生倡學東南了翁不至

熊鳳文不跪選司

熊鳳文以推官行取不跪選司太宰許進曰推官能不誦滕文選令為御史肯畏強禦乎竟拜御史

桑桂移風社

平涼桑桂成化

貢士官大名通判廉靜好古與同邑彭會趙天錫

倡移風社序曰平涼山水秀拔人習淳朴業惟耕讀確有古風比年喪亂不古俗信浮屠誑惑於始死及七七百日期年除喪飯僧道作水陸大會寫經造像云為死者減罪生天受諸快樂不為者必入地獄剉燒

春磨受無邊苦是以貧者弗獲慎終惟備神馬楮幣齋糗蔬果經資之  
費力不能逮則淺土經年蟲鼠穿富者忘哀作樂談經餽金飾備備  
器務為繁勝傾家破產迷惑不悟殊不知生含血氣知痛痒剪爪剃髮  
而灼刈之已不知苦死乃離形腐於黃壤與木石等神則飄若風灰雖  
剉燒春磨將安施乎然浮屠所謂天堂地獄者蓋以勸善懲惡耳世人  
親死而禱浮屠是不以親為君子而例視為積惡有罪之小人何待親  
之薄耶縱使其親積惡有罪豈賂浮屠所能免乎此則智者所共知而  
愚夫滔滔奉信風靡無已桂等生長是邦讀聖賢書浩歎頹風思與易  
之相為立禮社名曰移風嗚呼風不可移也所可移者人心耳人心雖  
為頹俗所染而天理之在人心終有不能泯者能以吾心之天感彼之  
天則澆必轉淳邪可變正曾謂風不可移哉凡我同志敦崇禮誼毋懷  
彼此毋間嫌隙凡遇鄉鄰朋儕之喪務為天理開導法語匡直斷以朱



文公禮制為準熄佛老尚哀戚貧者喻以義富貴制以禮其間古今異宜斟酌輕重一求合乎中正匪勉戮力人心欣動舉知為美始而正一家之風終而正一國之風何患禮之不復古哉雖然士君子立身進則有功於君退則有功於民奚獨喪禮耶患難相助疾病相扶道義相尚志行相勵過失相規使行業齊於古人芳聲耀乎當時而天下之風亦可移矣夫子勗哉

### 韓昌

韓昌洪洞人世醫昌精其術不計貨施藥先貧後富嘗見御者卧道中憐之診其脈傷寒為移燠室藥之汗愈乃行資以粥米洪武初避兵岳陽山中遇異人授以秘術遇疾不俟診視望之而決生死時稱神醫孫肅七歲誤吞針釘昌曰此兒不死毋憂也三年而出他日且生貴子後釘果從脇下出已生文官戶部尚書

毛中丞里居

陽信毛海隅先生思義以南京督儲都御史致仕呂涇野先生相問公歸邑居乎曰然蒨屋數間對縣學呂曰久宦何尚蒨屋曰自官主事來俸餘一二十金厯三十年婚子四嫁女二又親喪久外未治室也呂曰公歸亦何樂曰予師張先生尚健友人董某姻家王某並尚在與割雞漉酒以熙餘生耳涇野集

景暘孝愍

上元景司業伯時暘母陸太安人晚瞽數年所至求醫卒得金針於京師復明昔庭萱倏大如杯初司業涕泣樹萱曰萱花母療三年不花至是花赭

胡松抄書

滁州胡柏泉太宰少貧無書時時借抄手輯名臣奏疏置枕曰經理天

下在是矣

鄭慶祜蝗

嘉靖九年進士長樂鄭慶有章知滁州夏至滁及挾有蝗自西北來蔽天日丘陵墳衍麻沸所至禾黍輒殫民男婦奔競蔽野君簡勤敏吏民十數輩部分之令各詣蝗所打捕張幟縱金舉火開塹又嚴為禁防俾勿擾蝗為害其冬下令國中曰蝗善滋<sup>土</sup>之必遺種茲不拙害將何極其發子毋俾流毒於我茲土得亡算明年蟻果生息至蕃徧野復令毆捕如往年法加密諸庶人在官者悉罷遣如初僅留門子一人侍又下教曰有能捕蟻斗者官與穀五升石者與五斗以是人爭捕得蟻數百石蝗倍徙種幾殄絕有秋當其時雖不能微怨謾而潛膏隱澤其被與晏不鮮矣

滁州志談遷曰崇禎辛巳嘉興亦募民捕蝗與穀竟升合不給

嘉靖丙午延津大蝗有司遣人捕之康生周官恐人不盡力乃自白於

人有能捕蝗一石者即與錢百文人爭捕之不旬日以錢百千買蝗千石邑境蝗不為災延津縣志

### 王勅雲母

厯城王祭酒竹泉勅少得道術後督學河南試諸生見白雲出山急遣人十數里外視雲落處掘得白石如雪歸切片煮為腐甘美非常曰此雲母也

### 徐階論士

徐文貞公曰欲觀士大夫名節但不聯姻富室不接衽山人便是端莊之士馮元成集

### 林思承致仕

莆田林思承官淮安同知致仕所親止之曰公旦夕金紫矣思承曰心苟知止一命有餘若其無窮三公不足

唐樞

歸安唐樞一菴先生論博施於民而能濟衆重能字蓋人亦有施而不能者政不善也

今人但知顏子不校難及不知一犯字學他不來弟子謂曰何謂也曰顏子持己應物決不得罪於人故人有不是加他方說得犯若我輩人有不是加他必是自取所謂夫人必自侮然後人侮之也何曾是犯我輩未須學不較須先學他犯字李樂見聞雜記

唐順之

唐荆川先生論易文有吉凶大象獨言吉此聖人示人直入聖道路也

高拱知人

高拱<sup>中</sup>交相國署吏部日戊辰進士選秀水沈思孝等八人分令廣東俱日囑得之並厯侍郎其一中丞沈繼山先生說

張尚書學顏僉事皆賞捧入都相國一見喜曰今日得一督撫矣錢御  
冷說

### 張居正急才

張太岳編修時本院公譙演千金傳奇至蕭何追信凝視久之同列以  
專注譴之答曰君目將相遇合之難如此毋得草草蓋江陵意自有在  
非同戲謔

山陰吳克環洲出高文襄之門以器識見重時輒咨訪呼為吳學究蓋  
水滸傳中智多星也俺答孽孫郡吉初降文襄議同江陵以問克曰可  
受之有喻於此如麵二石作一大饅頭須大金大籠文襄意遂決後文  
襄罷江陵盡斥其黨獨克不廢或媚江陵刺及克江陵曰吾固悉之但  
難其代累遷少司馬而速把亥擾薊鎮江陵語冢宰為我致吳環洲能  
出鎮乎克聞之曰某効塞上久犬馬猶暫息之相公猶未忘我耶江陵

得報曰否否此原環洲意可再質之冢宰告兌兌謝曰往疏雖及此第  
薊鎮威繼光遼鎮李成梁兩大帥未易節制須尚書銜江陵曰不可第  
往勿憂不尚書也兌出鎮薊遼事定果進尚書終江陵兌無纖芥之嫌  
錢御冷相國說

浙江缺督學選司以某人擬江陵弗首肯選司却席請問曰其沁水劉  
東星乎東星在浙藻鑒得名歷總河工部尚書張鏡山先生說

徐階李春芳陸樹聲

青浦慧日寺落成少師徐存齋階倣東坡解帶事奉世廟所賜蟒衣  
一襲付僧圖圖寶留鎮山門因賦一絕單衣露冷宿雲華悞綰宮袍傍帝  
車拈向山門君莫笑細看還是舊袈裟萬曆丁酉大宗伯陸平泉樹聲  
年八十有九出衲衣一襲手書偈曰解組歸來萬歷捐盡將身世付安  
禪披來戒衲渾無事不向歌姬為乞緣嘉靖丙午李文定春芳將入秋

閨宿句容 寺題壁年年山寺聽鳴鐘  
匹馬西風憶遠公他日定須留  
玉帶題詩未可着紗籠及入相歸解玉帶留鎮

姚弘謨迎母

秀水姚少宰少孤母改適登第後迎養於家

袁洪愈貧宦

長洲袁安節清介絕俗雖善噉貧不屬饜每市蜺佐酒可竟斗許門生  
嘗餉十金輒三分之袖其一乘月步贈窮交其貧多繇此訪王元美留  
竟夕俄接家報中數元美問之方員進二十金見迫即代償之以盡其  
懽後解南太宰薦元美自代元美起南少司馬嘗戲曰吾生平此二十  
金用得着喻叔虞說

余有丁家祭

鄞縣余相國文敏父永麟幼穉時育於小江里余氏後鄉舉歷蘇州通



判生文敏既貴當贈三代莫知所自出不得已贈永麟所後父憐憐父  
鏗而命子孫家祭自蘇州公始禮因義起也

文敏少從宦蘇州慕崑山歸有光名將師之不果嘉靖乙丑文敏以編  
修分闈拔有光第二

沈思孝在戍

萬曆丁丑沈比部純父劾江陵奪情戍神電衛游某山剝蘚見石刻翠  
巖亭三大字旁題謫仙三百載此樂有誰傳鐫宋某年月日因推今日  
正三百年也巡臺徐時可欲辱之示期閱武純父短後衣橫矛踞罵於  
演武堂遂不至總督臨武劉堯誨檄高州同知劉石令以戍見純父應  
役中道止之環召時總督長樂陳瑞得報方嚙茗失臥辟地責中軍曰  
城內有謫臣何不我告亟通幣起居且致賀必求面純父行迫不往遣  
蒼頭報謝賜茶中堂語次泣下姚叔祥說

戚繼光

戚少保鎮薊門駐三屯營最久經畫周詳有祠總兵尤繼先之任不拜祠  
除夕公庫災獨題梁入銀牌存牌重五兩題梁年月少保所記也  
繼先歎戚公神人刑牲以祭

馮少墟規鄒南皋

鄒南皋元標居鄉好言事操月旦長安馮少墟先生嘗戒之絕不與聞

一事

申時行李廷機薄殯

吳縣申文定相國捐館屬其子太僕用懋曰先人殯並非川木勿貽我  
愧

晉江李文節相國捐館門人蔡太守善繼議用川木李夫人曰相公一生清節囑身後棺止直六兩不敢背其治命

李廷機鳩工

李文節宗伯時語李湘洲祭酒薦芳曰國家工役切莫先估計估計皆內相大臣為政彼但索已索故一倍至二三十倍吾不先估計且孟浪起工彼雖日有所需然不能計成數多少工止而彼散矣更無積聚錢俟彼分贓

趙大華

萊陽趙大華任鄆陵令邑民以不紡績大華勸諭夜行潛聽有紡績聲以良民勤紡四字識之次日呼至賞棉花五斤自此得紡之利及令永賴

李騰芳

李湘洲曰每見士大夫一捐館舍其子弟往往向人稱外侮人亦為之傷世態之炎涼歎人情之惡薄予以為不然君子生則人敬沒則人思

彼寂寞於生前而榮華於身後為人尸祝俎豆者何人哉人必自悔然後人悔之向使特位挾勢欺凌奪人無奈何直待其子孫方與覆算此所謂悖出悖入出爾反爾而稱外侮非矣

### 張臣感慟

麻城梅衡湘中丞國楨筮仕固安總兵張臣過邑彼宿將逐虜棒槌崖殪數千人時繼其冒功公獨加敬張驚問答曰棒槌崖之捷從來未有我輩子以天下豪杰非以其官也張不覺大哭伏地歎曰某血戰一生天子不知大臣不錄今公獨知某雖即刻死公前不恨

### 王汝訓散貲

王侍郎弘陽本富室以父防盜晨夕不安勸散其貲於親故十去其五父得夜息侍郎後益貧授徒里中自給室不能牖項輪通照農具雜陳了無官緒

張藐山先生說

唐文獻

上海唐抑所先生署翰林院篆沈四明當國移檄求印轅轅之雖四明不快然無以奪也內計時有所去留並未嘗請命錢御令相國說唐諡文恪所謂易名之典仍犯其名何也宜如陳莊靖文例易之

陳澹孝紋

澹安諸生陳澹父性嚴事之甚謹廬墓三載奉庶母如嫡撫庶弟孤姪晚歲手紋成孝字山陰王思任題孝紋堂

顧憲成寡欲

無錫顧涇陽先生少時讀養心莫善於寡欲反之寡欲莫善於養心最有味

衛一鳳辟狐

陽城衛桐陽大司馬前守青州有樂婦祟於狐間鼓聲堂上曰尚書正

人也義不敢近

鄭繼之

襄陽鄭鳴崐太宰留意品鑒典銓時殆八旬於士流素履口誦不爽

彭應參

萬曆甲午光山彭侍御按浙風裁峻厲不畏強禦烏程董尚書份  
范祭酒應期並怙勢扞綱繩其悍奴范至自經董嗾其婦吳氏訴於朝  
詔逮侍御後放歸

詹景鳳

詹中岳任南京吏部司務凡部曹謁總憲私第例趨左門惟銓即太儀  
門外延於別館詹謁右都御史海公瑞獨拱立直馳中道抵門踣問而  
言曰敝曹統領縉紳闥左右門以奔走人而奔走人左右門如體統何  
其後復徇海公事詹切責之

許弘綱責子

東陽許少薇總憲還里鄉人送柴問之云例也召責其子私權杖之

葉向高講學

葉臺山相國見鄒南皋先生論學曰公講孔孟予只講閻羅王鄒問其故曰不佞老矣填溝壑之日近苟有欺君悞國傷人害物招權納賄等事於閻羅王殿前勘對不過者皆不敢為鄒笑而是之

李九我相國 戒文筆福清欲效之李曰子效我殊難我尙嚴令人不敢強子面善無以謝其求也力不能兼可廢詩耳

吳道南

崇仁吳文定相國語嘉善錢太史士升曰若初入詞林須記三事不擬試目不受門生不出游庶保名節

竇子偁

竇子偁可揭按察兩浙剛毅敏決雖婦孺知其名遷石轄以御史沁水  
孫居相薦之時方指居相東林黨魁也厯官守法不附一廉如水竇自  
是絀議解官去不復出子偁萬厯壬辰進士

徐光啟

華亭徐文定初以右春坊右贊善兼  
授廉從不備自募人肩輿

道監察御史監軍出倉卒特

楊瀚

陽城楊瀚神觀頎偉萬厯  
拾遺調良鄉赤縣衝瘠其治如甯遠而稍馴之民犯博者褫其衣給驛  
卒自題門帖曰門如市心如水平塵不染提得起放得下百事敢為奏  
最限乙榜量移南京大理寺  
評事在時為右遷尋致仕素善酒嘗飲  
邑令張文運張連浮大白歎曰令君可人



馮氏義僕

華亭馮御史恩次子 可家幹馮良託以筭鑰 可沒子大夏蕩廢棄其家依妻金陵十餘年不歸良每歲收田租易金即匿藏之不一錢良久覓主歸以所積萬金還之大夏遂為富人後大夏沒諸藏金為他房瓜分良又不取一錢人稱其厚良子三皆諸生孫明玠天啟壬戌進士歷御史 良原趙氏

葛寅亮督學

錢塘葛此瞻大理前督學湖廣每行部謁孔廟輒命諸生講書次第數十人默定優劣有講回之為人也節聖人撒手是道賢人尚差一地位故拳拳服膺葛大賞之

丁賓老不忘孔林

嘉善丁清惠尚書年八十八崇禎庚午三月特北謁孔林償宿志

朱國禎秀才氣

丁清惠與烏程朱平涵相國善謂其居台鼎猶秀才氣象相國笑曰原是老秀才近來庶幾葉臺山無閤老氣

朱氏世改革相國不殖產曰我何敢忘祖父改革守藏時事乎

沈演四友二老

歸安沈何山尚書作四友二老圖身與王太宰永光畢司徒三才李宗伯騰芳曰四友與張總憲延登曰二老俱萬厯壬辰榜崇禎初起家

董其昌

華亭董玄宰宗伯坐部堂上朝鮮貢使謂為異人夏給事子暘使琉球歸求董書貽其來使

錢士升

嘉善錢塞菴相國先疏御令曰士大夫居鄉止宜杜門不聞一事若曰

欲作好事便開罪端蓋身非有私而因緣旁入安能預察而盡中其弊耶

好人之所惡惡人之所好是謂拂人之性若好人之所好惡人之所惡亦拂己之性

經正則庶民興史熟則名臣出以上俱面說

### 陳組綬結客

武進陳伊菴官兵部

結壯士千餘人皆漁陽大俠時勞以金

帛及卒或欲收其客為列校客曰我等教於義為陳君效死豈肯仰文吏鼻息耶哭其喪而散

### 陸夢龍

餘姚陸參政夢龍好談兵先是黔中閱軍令七校各魚貫進身坐貢院門禁闢入初軍多更番遞應至是術窮第七軍高拱北稱四百人閱試

止五人立斬拱北先後汰萬人

### 張燁芳

山陰張燁芳曰人而無友不如無仇亦足祛人眉宇間羸情氣 按  
燁芳居隣陳都諫爾翼都諫熾熾時大不能堪俄都諫以黨敗燁芳成  
進士嘗演魏忠賢諸劇陳隔聽亦不能堪燁芳官給事中被謫壬午補  
翰林待詔道臨清值北兵匿於道院發其裝得進賢冠徑人令諸人戴  
之俱不合獨宜於張被殺贈太僕寺丞

### 吳麟徵家訓

海鹽吳忠節家訓曰莫道作事公莫道開口是恨不割君雙耳朵插在  
人家聽非議莫恃築基牢莫恃打算備恨不鑿君雙眼睛留在家堂看  
興廢

熟讀經書明晰義理兼通世務世亂方殷八股生活全然冷淡農桑根

本之計安穩着數無如此者詩酒聲技非今日事

柯起鳳不負丞

休寧縣丞柯起鳳四川人以康生薦不卑其職才守自厲遇事  
敢斷凜若神明臺司委決無虛日聲出令長上為各司理所嫉構之去  
郡人祖送傾市竟任不私一錢吏部尚書鄭三俊嘗追訟其事

王朝堂死孝

流寇陷太康諸生王朝堂以父中丞  
全  
極見斫拊棺拒罵被殺棺得

藝筆

論幼儒勅

太祖高皇帝論幼儒勅有曰蓋於馬退山茅亭記見柳子厚之文無益也柳子厚之兄司牧邕州構亭於馬退山之巔非勞人而弗成既成而無益於民是害民也略不規諫其兄使問民瘼之何如卻乃咏亭之美曰因山之亭為基無雕椽斲棟五采圖櫟以青山為屏障此雖無益文尚有理其云白雲為籬籬此果虛耶實耶談遷曰讀聖諭得作文真訣矣存誠去浮根理資用今曲學矜句字之間沿誕謾之習於文體人品不相研切如五柳先生傳先生不知何許人也蓋淵明寓避世之意可一不可再而白樂天陸龜蒙輩效之則誕矣虛實之論誠如宸諭

宣尼遺筆

孔林石刻宣聖遺筆暑往寒來春復秋夕陽西下水東流將軍戰馬今

何  
在野草閑花滿地愁末書仲尼有章款此作偽者真東家丘即

顏子

國初朝鮮獻顏子以偽書卻之

海鹽秦駐山始皇碑

前賢灼灼後聖懋哉始皇承天越受帝命業超上古殲周滅鄭七雄靡  
餘六國是併功齊太古道深前王埒炎均昊美冠嶺黃靈七代敬構  
商堂縱聖凝神將記百海鹽縣志卷藹餘輝蜚聲萬禩梁天監二年八月二十  
三日右判史敬素立石此碑史記不載而鄭亡久矣謂始皇  
滅鄭何也

偽書

毛漸偽三墳張昇偽元命苞孫定偽關尹子阮逸偽元經宋咸偽孔叢  
子徐靈府偽文子戴師愈偽麻衣子袁康偽吳越春秋

明崑山王逢年偽天祿閣外史海鹽姚士彝偽於陵子

嵇康真蹟

錢塘楊廷筠以御史督學南畿有兄弟爭嵇叔夜手跡弟請田三十頃  
易之致訟御史命立寶書堂公貼之

王大令洛神賦

王子敬小楷洛神賦顧凱之畫其下藏內鄉張康侯家購以五百金康  
侯甲申避寇金陵張藐山先生借觀

雲麾將軍碑

萬曆六年河南李蔭宰宛平搆小齋發礎得唐李邕雲麾將軍碑碑石  
蕪沒良卿驛舍裂為柱礎可辨字百八十有九首篆存唐故雲三字蔭  
輦貶邑署名其齋曰古墨終戶部主事李邕書在浦城縣西十五里李  
思訓墓上



百家姓

百家姓相傳宋人作故首趙南雍志有唐虞世南百家姓一卷

蘇子瞻制義

蘇長公外集有孟子義一首蓋宋以命題試士士之應舉制義概如此題以佚道使民以生道殺民使民為農民曰是食吾之道也使民為兵民曰是衛吾之道也使民為城郭溝池曰是域吾之道也雖勞而不怨曰盤庚之民何以怨民可與樂成而不可與慮始蓋終於不怨也詩曰晝爾于茅宵爾索綯亟其來屋來春播百穀可謂勞矣然民豈不思之曰上之果誰為之也哉若夫田獵之娛宴好之奉上之人所自為之者君子蓋不以勞民也古者水衡少府天子之私藏大司農不以給共養勞費出少府為是也孟子曰以佚道使民雖勞不怨以佚道使民可也以生道殺民君子蓋難言之易曰古之聰明睿知神武而不殺季康

子曰如殺無道以就有道何如孔子曰子為政焉用殺夫殺無道就有道先王之所不免也孔子諱之然則殺者君子之所難言也

大學本義稿

朱文公大學本義稿友人沈世洎嘗見之多刪抹

朱文公集

慈谿謝象三三賓於亂時購宋板朱子集纔十金亡何人得宋板朱子集文頗不同多世所未見包長明說

心史鉄函

崇禎戊寅十一月八日蘇州承天寺浚胥井得鉄函重櫝啟之宋鄭所南先生心史一部外標大宋鉄函經內書大宋孤臣鄭思肖百拜封自元世祖癸未曆今三百五十六年按心史行世久矣想副本流傳不待胥井啟函也

宋濂

宋學士著作最富潛溪前後集在元季已盛行於世八 明劉伯溫選定為文粹十卷門人方孝孺鄭濟等又選續文粹十卷皆孝孺與同門劉剛林靜樓璉手自繕寫刊於義門書塾丙戌歲錢謙益於內殿見之孝孺氏名皆用墨塗乙蓋遵革除舊禁也

道餘錄

姚少師廣孝別號逃虛子摘二程先生遺書二十八則朱子語錄二十一則逐條析其謬曰道餘錄吳縣行人張洪見即毀其書自謂所以報少師耳

御史試莖芽菜賦

蒙城陳嶷薦賢良方正考選試莖芽菜賦嶷第一拜浙江道御史終按察副使賦曰南國之賓客於上國與北都主人論辨時事翊日請

於主人曰子居上都俛視八隅日覽天下之奇物亦知天下之奇味乎  
主人曰唯唯客何言與天下之味形類萬殊燧人作脩庖人之初曰哉  
曰嚮日拳曰芻八珍甲四海之美五味極六合之腴猩唇豹胎之鼎熊  
掌駝峰之厨趙普掣噉之炙何曾鵝掌之殊党家之羊羔美酒五侯之  
燕髀鯖餘 吳中之膾釣松江之鱸駕釀施蓼雪蛆脩俎寂蒲羞鱖芥  
醬滌鹽至若橙黃而蚶蜊實荻綠而河豚涪黃雀入幕之子烏雞啄粟  
之雞加之以椒桂益之以油酥當嘉賓之既集命細君而當壚巨觥淺  
酌豔曲吟唔調嚼滋味既美且都客曰子惟知葷腥之為味而不知清  
楚之嘉蔬也主人從而改曰北山採薇南山採薇祛堂堂北簷芹澗湄  
烹綠葵之嫩葉僂白薤之芳蕤補羸杞移繁蕪磨姑縷分於淮術波稜  
寸斷於踣趾醅糟子薑之掌沫臨新笋之餘梭魚子苔脯乳蕈輪菌  
九蒟山藥三炊漢家丘嫂之鰥冰壺先生之藟至若錢塘之茭苳商山

之紫芝大宛之首宿二蜀之雞栖揀擇加精調肺得宜香聞爽臆味適  
野眉當舉案之頃會稱觴之時飫此嘉品喜溢厥頤顧翳桑之徒餓笑  
首陽之空饑視彼蔓菁何物蘿蔔奚為客日子若徒知異之為美而不  
知近之為奇主人瞠焉語塞拱手噤噤曰然則子所言美者請備言而  
述之客曰有彼物兮冰肌玉質子不入於淤泥根不資於扶植金芽寸  
長珠糝雙輕匪綠匪青不丹不赤宛訝白龍之鬚彷彿春蠶之蟄雖狂  
風疾雨不減其芳重露嚴霜不凋其實物美而價輕衆知而易識不勞  
乎椒桂之調不資乎芻豢之計數致而不窮數食而不厭雖以赫乎桂  
史之嚴每嘗寘之於齒牙薦矣憲臺之遠亦嘗歛之而深入當乎退食  
之委蛇則伴其倉米之廩食至於滌清觴漱清臆助清吟益清臆視彼  
主人所陳者奚相去倍蓰而翅萬億也與主人聞而歎曰得非市之所  
鬻莖芽菜乎客乃曰然主人曰美則美矣毋語近而遺遠厭富而樂貧

客曰子何見之晚也夫天下之味適口者為佳天下之士無欲者為貴彼之所云者非不口欲我之所卻者恐為心累脫若致之弗克則役之於心役之於心則為口體之累傳不云乎養其小者則失其大者大者既失雖羅五鼎亦惟取羞雖享太牢適增其醜語既客即揖謝于于而退

### 周敘修宋史

正統末南京翰林侍講學士吉水周功敘敘請刪修宋史以畢先志許之功敘曾大父以立元鰲溪書院山長上書修宋遼金三史推宋正統後功敘修宋元同上元陶元素未就卒

### 蕭陽物史

蕭田周梁石瑛與黃太史仲昭同修興化府志論議間有不合自謂蕭陽物史

張元禎

張東白先生作文屬草每指掌大作蠅頭細字或用故紙覆背書之

詩韻辨

華亭張東海先生<sub>所</sub>詩韻辨曰韻書始於江左弊有因襲雖有覺者力  
莫解正 我朝始刊定洪武正韻一洗千載之陋誠萬世之幸也惟詩  
家猶泥唐韻曰凡古詩之流可用正韻近體律詩惟用唐韻問其所以  
則曰律詩自唐始故也苟依正韻則曰落韻特遵令之制耳樂其寬耳  
試叩以唐韻冬東青清之屬何以異虞模麻遮之屬何以同則曰自有  
五聲七音輕清重濁於其間也噫是皆因襲而不察淺陋而無見口耳  
相承臆度妄語殊不知江左殊韻正坐不知七音之當解直據一方之  
所習故失立韻之本原也何輕清重濁之分耶借曰唐詩用唐韻則騷  
詞用楚韻古選用漢韻耶唐韻襲類譜而作故梁韻也何唐詩而用梁

韻耶唐韻至宋已加通併非唐之舊則宋韻矣又何唐詩而用宋韻耶  
正韻惟取諧協固寬矣唐韻之聳牙者亦得而押豈窄耶且作者何計  
寬窄也學士宋景濂所序慎重精密之至凡詩皆合用正韻且不待辨  
矣猶慮詩家習觀陰氏韻府羣玉又以正韻定之則凡詩之不宜用唐  
韻又可識矣何淺陋者之因襲未復於正又唱傳妄說使高明者亦不  
得隸於正也或曰李杜蘇黃諸家者皆用唐韻人不知病蓋唐宋之世  
病在韻作者弗病也況雖在唐宋不依唐韻者亦多矣泥者弗知惟取  
諧協則傳會其說曰漏底韻出入韻猶韻書上平下平不知由編帙重  
大而分乃曰音有上虧下虧之異也上平始於東終於山之意也淺陋  
類此不足一笑泥者反以正韻為失竄免笑乎

李空同先生曰張東海韻辨冬東青清何以殊虞模麻遮何以同夫東  
冬青清反切本殊而人自不殊虞模麻遮調協本同而人自不同顧歸



罪韻者嗚呼人之蔽至此哉韻母子相生五音互之自然而成聲音不能加愚不能損信如此言則冬江真先虞尤不得通押而說不得說韻哲不得哲聲耶今人因前人云四聲出於沈氏遂不復根究便立訓教人不知茲韻其來已遠沈特校定之耳

張東海自題像

隨處丹青寫我神故人相見問何人於今百草張東海只有元來一個真

司空圖

宋王禹偁辨五代史闕文云圖字表聖自言蒲州人有俊才咸通中登進士第雅好為文躁於進取頗自矜伐端士鄙之從事使府洎登朝驟歷清顯巢賊之亂車駕播遷圖有先人舊業在中條山極林果之美圖自禮部員外郎避地焉日以詩酒自娛屬天下板蕩士人多往依之互

相推獎由是聲名藉甚昭宗反正以戶部侍郎召至京師圖既負才慢  
世謂已當為宰輔時人惡之稍抑其銳圖憤憤謝病復歸中條與人疏  
不名官位但稱知非子又稱耐辱居士其所居在鎮貽溪之上結茅屋  
命曰休休亭嘗自為記云云以上梁史舊文按圖河中虞鄉人少有文  
采為鄉里所稱會王凝自尚書郎出為絳州刺史圖以文謁之大為凝  
所知所賞歎山是名不與凝知制誥遷中書舍人知貢舉擢圖上第頃之凝出為宣州觀察使  
辟圖為從事既渡江御史府奏圖監察下詔追之圖感凝知己之恩不  
忍輕離幕府滿百日不赴闕為臺司所劾遂以本官分司俸之召拜禮  
部員外郎俄知制誥故集中有文曰恩恩稽命黜僚洛師於今十年方  
叅綸閣此豈躁於進取者耶舊史不詳一至於此是圖見唐政多僻知天  
下必亂即棄官歸中條山尋以中書舍人召拜禮部戶部侍郎皆不起  
及昭宗播遷幸州圖以密邇乘輿即時奔問復歸還山故其詩曰多病

形容五十三誰怜借笏趨朝叅此豈有意於相位耶河東節度使王重榮請圖撰碑得絹數十匹圖置於虔鄉市中恣鄉人所取一日而盡是時盜賊充斥獨不入王官谷河東士人依圖避難獲免者甚衆昭宗東還又以兵部侍郎召至洛為柳燦傾阻一謝而退梁祖授禪以禮部尚書詔辭以老病卒年八十餘又按梁室大臣乃至有如敬翔李振杜曉楊涉等皆唐朝舊族本以忠義立身重侯累將三百餘年一旦委贄朱梁其甚哉者贊成弑逆圖以清直避世終身不仕梁祖故梁史拾圖小瑕以泯大節者良有以夫柳燦為相巨僚多被放逐為監察御史尤加畏慎昭宗郊禮畢上章懇乞致仕曰察臣本意非為官榮可驗哀羸庶全名節上特賜歸山其詔略曰既養高以傲世類移山以釣名心惟樂于激流士非顯于貪祿匪夷匪惠特忘反正之朝載省載思當徇遐棲之志宜放歸中條山詔辭乃柳燦之文也時多以四皓二疏譽之惟僧虛

中云道裝汀雀識春醉野人持言其操履檢身非傲世者也又云有時看御札特地挂朝衣其尊戴存誠非邀君也

楊守陳

楊文懿書惟立所作許先生哀頌詞後

銘志之言多溢美予弟此作蓋眩於銘志之言也後有覽者尚論其世則茲人者難乎免於君子之誅矣言其可易哉

李夢陽論文

昔人謂文至檀弓極遷史序驪姬云檀弓第曰公安驪姬約而該夫經史懸殊經主約史主該譬之畫者形容之也責得象具且如非驪姬食不甘味寢不安枕之類是也經者史之要者也曰安而食寢備矣自檀弓文極之論興而天下好古之士惑於是惟約之務為漸洗為贅牙為剗剔使觀者知所事而不知所以事無由彷彿其形容西京之後作

者無聞矣

李空同先生刻陶淵明集盡去評注曰青黃者木災也太羹之味豈筆口所還哉按古人注經史子外集不多及六臣注選千家注杜尚矣其以批點行世者蘇老泉之於孟子劉辰翁之於李杜為得其繁萬曆中晉江李贄所閱著藏書焚書等刻導煽輕誣末年吳興凌氏閔氏專刻硃批時雖紙貴災木何極

舒芬與友人論文曰六經未可以文法摹擬也書禮序述即事見道風雅咏歌以聲和律曾何章法句法不類之顧耶易始伏羲不知六畫奇耦其章法句法果安在耶春秋仲尼所筆削也簡者一字繁者僅三十五字其句法章法果安在耶故今之論文者動稱六經則亦前人誤之耳愚嘗以六經當以道論不當以文論

李夢陽何景明

李何哀然四傑之首冠冕當代。人無異咏。間有微文。未加點璧。近常熟錢牧齋選明詩論李何最嚴。不啻輪攻矣。雖非定論。錄竣公據。

獻吉生休明之代。負雄鷲之才。憫然謂漢後無文。唐後無詩。以復古為己任。信陽何仲默起而應之。厥後齊吳代興。江楚特起。北地之壇坫不改。近世耳食者。至謂唐有李杜。明有李何。自大厯以迄成化。上下千載。無餘子焉。嗚呼。何其諄也。夷考其實。平心而論之。由本朝之詩。汴而上之格律。差殊風調。各別標舉。興會舒寫。性情源流。則一而已矣。獻吉以復古自命。曰古詩必漢魏。必三謝。今體必初盛。盛唐必杜。舍是無學焉。率模擬剽賊。於句字之間。如嬰兒之學語。如童子之洛誦。字則字句則句。篇則篇。毫不能吐其心之所有。古之人固如是乎。獻吉曰不讀唐以後書。獻吉之詩文。引括唐以前書。紕繆挂漏不一而足。又何說也。國家當日中月滿。盛極孽衰。粗才笨伯。應運而起。雄霸詞盟。流傳偽種。

二百年以來正始淪亡榛蕪塞路先輩讀書種子從此斷絕豈細故哉  
後有能別裁偽體如少陵者必以斯言為然其以是獲罪於世之君子  
則非吾所惜也

仲默初與獻吉輩復古學名成之後互相詆譏兩家堅壘屹不相下於  
是低頭下拜王美陂倒前仗之戈俊逸粗浮薛西原分北軍之祖則一  
時之軒輊已明身後之立黃少息矣予獨怪仲默之論曰詩溺於陶謝  
力振之古詩之法亡於謝文靡於隋韓力振之古文之法亡於韓嗚呼  
詩至於陶謝文至於韓亦可以已矣仲默不難以一言抹殺者何也淵  
明之詩鍾嶸以為古今隱逸之宗梁昭明以為跌宕昭彰抑揚爽朗橫  
素波而旁流于青雲而直上評之曰溺於義何居世運還流風雅代變  
西京不得不變為建安太康不得不變為元嘉康樂之興會標舉寓目  
即書內無乏思外無遺物正以暢漢魏之飈流革孫許之風尚今必欲

希風枚馬方駕曹劉割時代為鴻溝畫宋元為鬼國徒抱刻舟之愚自  
違舍筏之論昌黎佐佑六經振起八代文亡於韓有何援據吾不知仲  
默所謂文者何文詩者何詩也昔賢論仲默之刺韓以為大言無當矯  
誣輕毀箴為膏肓尤為篤論矣獻吉兩書駁何矛盾互陷獨於斯言了  
無諍語弘正以後偽謬之學流為種智後生面目偃背不知向方皆仲  
默謬論為之質的也

### 江河伏流

泰州儲平甫為正德辛未進士歷福建按察僉事輯革除錄博採靖難  
諸臣題曰江河伏流平甫卒門人私謚貞文子

### 常倫逸詩

沁水常評事倫題檣山大雲寺壁宿此非一夕游此非一朝山夫頗解  
狂夫趣時儲斗酒來相招殿前長松十圍大我欲絕粒栖雲巢字大如



斗今存評事集不載

王璜雲中歌

濬縣御史王璜正德辛巳進士雲中歌八首一日小王子打圍時自稱北狩產龍姿墩上老軍莫相信 英皇元不納胡姬

胡璚

彰德胡璚嘗咏時苗還犢事任中如有子君欲付何人 洹詞

徐霖

武宗在臨清召江寧徐霖授教坊司官不拜乃授錦衣衛鎮撫久益辛至呼其字子仁進必敝袍遂賜斗牛襲衣至南京嘗夜過其家從容懽燕四更乃罷

前李攀龍

濟南李攀龍止白雲樓集偶友人處鴻爪集四帙云濟南李攀龍于鱗

著重讀之則常州  
之悞良不虛耶

人官太僕

在正德時非歷下也曾參殺人

### 兩京賦

訓導

彭大雅柳州通判常熟桑悅御史江寧余光貢士盛時泰南

京刑部郎中臨川師機並作兩京賦光奏付史館賜鈔千貫安福李學  
士時勉慈谿陳侍講敬宗並作北京賦教諭

聶鉉作南京賦

### 兩皇明通紀

嶺南梁億東莞陳建各著通紀

### 張邦奇

張文定邦奇作贈太監雲奇傳云奇洪武間以內使守西華門時丞相  
藍玉居第去門不數十武一日詭言其第井中醴泉涌出請上臨觀  
而選壯士衷甲伏屏帷間以俟奇知之將上變云按此胡惟庸事文

定宿學不宜悞或梓人之訛

修誌

林煙修福州府志人物有邪佞止宋人不及 國朝孝子割肝療親者二人去之烈女如科甲例每行二人其斥割肝者曰使人割之耶抑自割之耶人割之則世未有肯無故操刀而殺人者自割之其人已死矣又安能內探五臟辨其所謂肝者而後割之耶其哉其妄也又福清林榮初則仁歲貢兵部尚書本朝列卿年表未載

平涼趙浚谷時春嘉靖庚申作平涼府通志官師人物美惡備列藝文僅記銘若干首無詩

王道書壁雜帖

順渠子曰吾於古人有四恨焉孔子曾見老子而孟子不得見莊子此一恨也孟子得見子思子而荀卿不及見孟子又從而非之此二恨也

楊子雲與鄭子真嚴君平同時同處且知二人之賢而不能相隨以隱此三恨也二程親見康節而不能傳其先天之學此四恨也宇宙間有此四大欠事而古今人皆未嘗說破若以為當然者然此又恨外之一端也

王慎中

王遵巖先生作晉江楊角山墓志銘戶部主事李纘父也志述纘之言吾楊姓也世居安仁鄉之鈔舍村以力農本業自給吾父早孤而壻於陳城居也遂居於陳之東隅陳母故李毅齋公某之甥也毅齋無子故吾父育於李而為之子稱李而姓陳也鄉人之敬愛吾父者知為李角山翁而不知為楊也惟吾父始配陳某知之而繼室張氏謝氏與吾兄續亦不能知而纘獨知之今將題名於阡作主於廟惑於所稱之姓先生其謂之何云云夫宗之必有別異姓之不相為後也在禮記之矣李

君雖欲徇翁之情其如禮何請志之曰楊角山處士之墓  
先生作筍江潘翁墓志銘銘作長論又古法之變

國朝人物編

江都葛澗子常好積書撰國朝人物編自國初迄嘉靖數百卷人為列  
傳甚悉年七十餘友人私謚正學先生

夏惟訥

崑山夏惟訥好求遺書嘗秘一篋不以示人沒後啟視充管數十枚手  
錄雜記百餘卷

唐觀

江陰貢士唐觀著延州筆記李肇鷄於民家屏障上斗麥易之噫文人  
遺業類觀者何限安得盡肇鷄其人刊以問世耶

李于鱗王元美手抄

陳眉公曰李于麟王元美在刑曹時手抄史記文選一部舉觥誦以記  
否為賞罰大泌山人批閱以及南北史皆有小識錄他經傳稱是

李于麟閱史記

殷正甫士儼有李于麟所閱史記於秦始皇本紀止園河魚大上人頭  
畜鳴八字沈懋孝長水集

王元美讀書後毀論

王元美所著讀書後四本捐館後公子吏部士騏於貨即塘中重價得  
今行世又毀論十本係先生手書無副刻常熟錢牧齋乞於吏部者秘  
不示人辛卯九月書室災不存惜哉噫文人士孫如任昉李白許渾諸  
君子筆潤墨替無論矣有真表若吏部而遺簡灰滅他何望乎

余翔

莆田余翔宗漢嘉靖

貢士仕全椒令有治才兩造盈庭平決無停

畧有羅氏鬻宅轉展數姓至武氏洵井得銅鑊四具加釘焉呈於縣公  
彷彿夢人以羅擔屍過其前時羅氏父死久訊其子已七十自供父本  
牙僧正德間四客投店挾重貲父端午日酖殺之釘腦骨投井中羅子  
論辟其家竟絕復解任歸益肆力文章而游興不減盧敖家人生產不  
問

穆文熙焚書

東明穆文熙小春憲副購書十餘萬卷疾篤盡舉所積焚之

謝陞李漢書

新安謝陞少連改陳壽三國志為李漢書予蜀正統魏吳世家按宋蕭  
常後漢書鄭雄飛續後漢書翁再蜀漢書元金華張樞陵川郝經  
長洲吳尚儉並續後漢書

春雪詩

鄞縣全天敘萬卷

進士試館之先夢大父少司空元立戒以春雪

詩勿用六出如其言獲選

無名氏詩

僕夫不識路躊躇路旁久寒風吹衣襟落日照馬首吳中無名氏作蘭溪吳孺子極愛之謂深得古致

明雋

濮州李尚寶先芳選

國朝燕趙秦晉齊魯河洛淮揚藩獻之詩附以

蜀曰明雋吳越荆楚不預焉東阿于文定公序曰自二南以下十五國風皆江以北地也降而春秋吳越之歌吟乃出降而戰國荆楚之騷賦始傳故江以南之聲則歌吟騷賦之流而風之餘也非始音也原音之始以北先也按李尚寶初善王元美後元美從于鱗游改嚮移好故明雋之外吳越荆楚有以也然所選多靡豔舒曼



宋登春

宋山人登春讀書嶧山厭薄交游乃作一小戶非匍匐不能入名曰狗洞縉紳先生過訪者輒難之惟濮上李伯承往來其中趙州強居仁集李伯承逢山人濮上館於清平閣日啖狗脯飲白酒夜誦楞嚴經念伯承殷勤間與唱和援筆草就四座傾倒

北雍刊史

新建張洪陽位司業刊二十一史糜工部六萬金有奇李湘洲集

陳于陞修史

南充陳文憲相國時修正史

列聖本紀皇后本紀建文景泰以實錄附載專紀有待郊祀廟祀典禮樂律天文曆法宗藩學校選舉職官經籍賦役貨幣漕運河渠鹽法軍政兵制馬政刑法絕國九邊凡二十二志

揚徐滁陽三王傳 高祖之十七藩 成祖之二藩 仁宗英宗各四藩 憲宗之三藩 外戚 洪武之功臣諸臣建文諸臣永樂之功臣諸臣洪宣諸臣正統天順諸臣景泰諸臣成化諸臣弘治諸臣正德諸臣嘉靖諸臣隆慶諸臣又理學文苑循吏高逸孝節亂逆權倖方技四夷列傳類二十六

志初畢丁酉擬列傳六月三殿災輟業又南充前卒四明沈一貫殊不以為意非其始議也

### 西冷社

萬曆丙戌八月歙縣汪道昆鄞縣屠長卿隆輩集西湖之淨慈寺仁和卓明卿餘杭徐桂為地主倡西冷社

### 孫冕

孫冕字文中江西德化人歲貢正德間任北通州訓導善詩畫嘗和李

西涯春興詩八首今錄其二山館悠悠依峻坡別來應是兩年過鹿麋  
昔日游偏好風雨他鄉夢更多松下小軒閑雨菊月中荒徑掩雲蘿歸  
來若待頭顱白其餘巖花笑客何一其竹垣向裏闌新池徑曲門迂去每  
遲鳥弄落花人未到魚吹新荇月先知天邊客夢何時醒江上歸舟此  
日移喚起巢由作賓主不知身在昔堯時

事詩

夜月烏啼白門柳隔江人唱後庭花武康吳允兆永嘉何元咎各爭為  
己句餘杭徐茂吳桂日句未佳何爭為

喻應益

新建喻叔虞憲副楓谷先生均子也咏滕王閣萬壽宮各四首  
飛閣崇臺勝地留層巒遠水檻中收萋萋自綠王孫草歲歲空生帝子  
洲煙樹尚含羅綺怨風濤不散筵紋愁漂零莫縱登臨目門掩斜陽獨

倚樓其一芳洲草樹碧纖纖醉倚臨空意未厭山翠過江雲入戶春聲  
出谷鳥窺簷花憐綺陌飄歌扇柳近紅亭曉酒帘千古繁華流水盡獨  
留明月上珠簾其二梅風杏雨柳煙開滿眼芳菲祇自哀客子臨高曾  
作賦游人攬思獨登臺於今殿閣盤空起依舊雲山隔岸來不識王郎  
風送別誰言伯璵更憐才其三關市煙塵黯未通蕭條旅泊散江風龍  
河蜿蜒滄波上雉堞參差晚照中昌邑舊城葭莢渡南唐廢址水煙空  
芳時士女應多恨速莫還歌大小東其四滕王閣

百疊青山磴道盤丹臺深鎖赤闌干階前柏是當年樹雲裏家猶舊日  
壇漢祀祇今歸太祝宋皇曾此拜祠官無勞更表洲沙識湖落空江鉄  
柱寒其一九柏歲難偃翠苞亭亭十里辨煙梢雲深珠樹棲歸雀月滿  
霜潭泣老蛟風殿香浮爐影細星冠夜集珮聲交野人掃地齋心拜芳  
渚青蘋藉白茅其二立功自昔滿鄉邦飛劍雲中氣尚雙三洞絳霞飄

羽蓋五溪瑤草映芝幢金丹雞犬歸仙島鉄鎖魚龍卧楚江里社年年  
誇禱賽九天時擁百靈降其三白裕青鞵稱短衫採芝幽澗荷長鑣乍  
瞻丹壑窺金穴細讀立文叩石函天豁神皋開廣漠樹盤仙嶠出巉巖  
雲房玉啓松關月未到蓬山已隔凡其四萬壽宮

王穉登

萬曆癸丑元旦吳縣王百谷卧疾吟迎春詩一首即逝

馮元成論文

馮丈所先生曰古之文簡今之文繁古之碑碣志銘苟無闕繫則不書  
如緩急親黨不過曰待以舉火數十字一二語耳今則連篇累牘曰某  
也婚某也葬數其事而稱之數其人而記之瑣瑣屑屑如甲乙簿何當  
哉憶予居常所為緩急人者一月或至數十事使他日子孫欲為予紀  
載則且至數十冊簿豈理也哉唐以來韓昌黎最為大家其志銘等文

具在寥寥僅一二百言耳然其時且以謏莛訊之至於今或一序數千言或一傳數萬言荊州先生所謂山河大地不能作架子誠有味乎其感歎也是故君子之文寧損無益寧慎無濫寧拂人之子孫無違人之月旦

周玄暉

崑山周復俊子顓南京太僕寺卿有館於木人涇之旁著涇林雜記涇林類記孫玄暉萬曆丙戌進士嘗任御史左遷補電白令放歸著涇林續記始舉筆赤蛇墮所刊成怨家張氏增飾官掖一二事尊於縣令陳祖苞撫按奏上致宸怒逮下刑部獄卒人多寃之

陳植之

武林布衣陳植之 雖業醫苦吟好學歛縣吳克德符摘其佳句如疎鐘四壁靜微雨一燈明移花春徑雨看竹午窗風繞舍田疇熟遙村

砧杵連王門等自好客舍缺空彈河朔追狂飲滄浪起浩歌因贈之詩  
曰昔賣名山藥女子識伯休孝先尋教授大有童蒙求簞瓢在陋巷朝  
夕僅能謀上有白頭母嘔殺代庶饑下有黃頭兒擁絮視輕裘子身同  
鰥魚牧犢為好仇苟非真有道疇能堪此愁自我不相見十年幾再周  
時時卒舊業隱若對前修重逢億愈甚每語無怨尤依然曳杖屣強歌  
仍自酬感贈不遇賦沈思冀一抽申之貧士咏庶接古人游異時高士  
傳真隱定見收

### 中秘書

晉江謝肇淞在杭為水部日福清葉相公直閣求閱秘府書潛隨入翻  
閱僅抄劉俊村集三十冊

### 收書法

南充陳元忠相國子陸好儲書平湖沈幼真太史懋孝勸其據類書注

中所引証之書覺篇目不經見者日月標記今書賈時時博求之無意中忽得奇書又據天下書目考其版籍在諸路者時時馳一託交游間如目搜羅期得乃已自戊辰至甲戌七年元忠以此法得奇書三千部及家艱寄書京師勳戚家半失去

### 纂書

開國事畧本湖廣行都司經歷蔡于璧之龍飛紀畧卓氏藻林本吳興王氏所輯嘉隆以來諸公掠美者頗多噫仰眠床上看屋梁著書千秋萬歲誰傳此者幸傳矣又為宋齊丘所據惜哉凡纂書有三貨得之可也陰得者次之最下則蹴踘

### 厄書

藏書佳事也閩省不數家家不數傳如浦江義門鄭氏八萬卷燬於火義烏虞侍郎守愚參政德輝父子樓藏萬卷畧曰樓不延客書不借人



後蘭谿胡孝廉應麟賤直得之今亦佚盡太倉王元美書最富再傳而失開封中尉睦掇之萬卷堂會稽鈕氏之萬卷樓吾寧祝侍郎以燕之萬古樓武康駱侍御駿曾平湖馮孝廉茂遠常熟錢宗伯謙益諸家非流散則妬焰吳噫縹帙緗函何預天曹事往往被厄不能久緗設靈威丈人之秘牒主夷使者之珍符壯卿孃而儲二酉概如此厄天上司書吏地下修文郎亦寂寂難堪矣楊循吉既老散書親故令蕩子爨婢無復着手是或一道也

錢宗伯好儲書尤喜較訂廣蒐博引一編中粉墨丹青曾見錯書有所疑悞千里之外託人研攷其購藏甲於東南亂後撰明史凡二百五十卷辛卯九月晦甫就越後日見燼火始作見朱衣者無數是非不得其平遂以榮感掃之隻字不留亦一異也

文替

正德中鄱縣王簡討九思敬夫失官老而喪明四方求文口占授之人疾書不給

萬曆末秀水陳學士懿典孟嘗晚喪明詩文酬應如故出謁公府侍兒牽其裾即揖讓進退動如禮

唐府輔國將軍字決五歲喪明從師畫掌識文字日月記千言著名獻錄辨疑碑各一卷

華亭唐汝詢仲言五歲目盲父兄抱膝上授詩好聽授博通經籍注唐詩解五十卷援据該博著編蓬姑茂等集雖使楊鶴旌其虛曰耳學淹通捐俸刊其書 常過常熟錢謙益所酒間誦子虛上林諸賦杜白諸長篇不遺一字留校杜詩時有新義如解溝壑疎放之句云出於向秀賦嵇志遠而疎呂志放而曠亦前人所未也

鍾惺譚元春

鍾譚詩行於世孟津王鐸宗伯曰如此等詩決不富不貴不壽不子

### 洪範明義

漳浦黃石齋道周著孝經集傳又奉命纂洪範明義四卷戊寅被謫即  
進呈云臣攷篇中有錯簡者三訛字者三錯簡如五紀三德數言而在  
後威福建極數言錯而在前訛字如晨為農戈為武極為極之類皆伏  
晁之所不稽鄭孔之所未說宋元諸儒稍發其端 明興諸儒未竟厥  
緒云

### 蔣德璟日記

晉江蔣八公相國性嗜書留心經濟有部郎便掄闢語之曰彼處馬首  
頗多宜注意部郎初不以為然至則果如其言所著日記

### 爭妾詩

崇禎癸未楚撫宋二崔敗沒妾金陵陳氏以色藝為門客王屋所聘貴

陽謝參政上選先娶致訟新安貢士程奎詩歌舞叢中度歲華一朝忽  
散抱琵琶前身定是烏衣燕不在王家即謝家

山城曲

十七八正少二次明少年年少如春草草榮一霎然 萋萋武藏州四  
圍無山島月出惟青草月沒還青草 山城者日本也好事有譯其曲  
者見鄭以偉猶奕稿

永和宮詞

揚州明月杜陵花夾道香塵迎麗華舊宅江都飛燕井新侯關內武安  
家雅步纖腰初召入鈿合金釵定情日豐容盛鬋固無雙蹴鞠彈碁復  
第一上林花鳥寫生綃禁本鍾王點素毫楊柳風微春試馬梧桐露冷  
暮吹簫君王宵旰無懽思宮門夜半傳封事玉几金牀少宴眠陳娥衛  
豔誰頻侍貴妃明慧獨承恩宜笑宜愁慰 至尊皓齒不呈微索問娥

眉欲蹙又溫存本朝家法修清燕房帷久絕珍奇薦勅使惟追陽羨茶  
內人數減昭陽膳維揚服製擅江南小閣爐煙沉水含私買瓊花新樣  
錦自修水遞進黃柑中宮謂得君王意銀鐲不妬溫成責早日艱難護  
大家比來懽笑同良娣奉使龍樓賈佩蘭往還偶失兩宮懽雖云樊姬  
能辭令欲得昭儀喜怒難緣縈小字書成印瓊函自署充華進請罪長  
教聖主憐含詞欲得君王愠君王內顧惜傾城故劍還存敵體思手詔  
玉人蒙詰問自來階下拭啼痕外家官拜金吾尉平生游俠多輕利縛  
客因催博進錢當筵便殺彈箏妓班姬才調左姬賢霍氏驕奢竇氏專  
涕泣微聞椒殿語笑談豪奪灞陵田有司奏削將軍俸貴人冷落官車  
夢永巷傳聞去玩花景和門裏誰陪從天顏不懌侍人愁后促黃門召  
共游初勸官家伴不應玉車早到殿西頭兩王最小牽衣戲長者讀書  
少者弟聞道君王譽定陶獨將多病憐如意豈有神君語帳中漫云王

母降離宮巫陽莫救蒼舒恨金鎖凋殘玉筋紅從此君王慘不樂農臺  
置酒風蕭索已報河南失數州况驚少子傷離落貴妃瘦損坐匡床慵  
髻啼眉掩洞房豈惹湯溫水葦冷荔枝漿熱玉魚涼病不禁秋泪沾臆  
徘徊自絕君王膝苦沒長門有夢歸花飛寒食應相憶玉匣珠襦啟便  
房薤歌無異葬同昌君王欲製哀蟬賦諫筆詞臣有謝莊頭白宮娥暗  
頻蹙庸知朝露非為福宮草明年戰血腥當時莫向西陵哭窮泉相見  
痛蒼黃還向官家問主王幸免玉環逢喪亂不須銅雀怨興亡自古豪  
華如轉轂武安若在憂家族愛子雖添北渚愁外家已葬驪山足夜雨  
椒房陰火青杜鵑啼血濯龍門漢家伏后知同恨止少當年重貴人碧  
殿淒涼新木拱行人尚識昭儀塚麥飯冬青問茂陵斜陽蔓草埋殘蘗  
昭丘松檟北風哀南內春深擁夜來莫奏霓裳天寶曲景陽宮井落秋  
槐

思陵長公主挽詩

貴主徽音美 前朝簡命光  
鴻名垂遠近 哀誄著興亡  
記體皇枝貴 承休聖善祥  
母儀惟謹 廟家法在茲  
莊上苑苑穠桃李 瑤池小鳳凰  
鸞章青綉 徒魚笏 縹囊沉燎  
薰爐細流蘇 寶蓋香襖期陪  
祓水蘭館助條桑 綠綵芄蘭佩  
紅螭薤葉璋 錫封需大國 喚仗  
及迴廊 受冊威儀定 傳烽羽檄忙  
司輿停鹵簿 掌瑞徹珎璜 嫠宿明  
河澹微垣 太白芒至尊 憂咄吒仁壽  
涕彷徨 鄉邑年方幼 瓊華齒正芳  
艱難愁付託 顛沛懼參商 文葆憐還  
戲 勝衣泣未遑 從容咨傅母 倥急詢  
貂璫 傳箭聞嚴鼓 投籤見拊床 內人  
縫賜甲 中旨票支糧 使者填平朔 將軍  
帶護羌 寧無一矢救 足慰兩宮望 盜賊  
狐篝火 關山蟻潰防 逍遙師逗撓 奔突  
寇披猖 牙森吹看折 梯衝舞莫當 妖氛  
纏象闕 殺氣滿陳倉 天道真蒙昧 君心  
慨慷 割慈全國體 處變重宗潢 胄子除  
華綏 家丞具丞裝 勅須離禁闥

手為換衣裳社稷仇宜報君親過勿忘遇人端退讓慎已舊行藏國  
母磨笄刺宮娥掩袂傷他年標信史同日見高皇元主甘從殉君王  
入木夾抽刀凌左闔申脰就干將噴血彤園地橫尸紫藥汪絕吭甦又  
咽暝睫倦微揚褰褥移衾第需胸進夕漿誓肌封斷骨如城吮殘創死  
早隨諸妹生猶望二王股肱羞魏相肺腑恨周昌賦道仍函谷兵來豈  
速康六軍夢面慟四海過音喪故國新原廟羣臣舊奉常賜主陳厭翟  
題湊載輶轅陸倕賢妃塚山疑望子岡銜哀生父老主祭失元良訣絕  
均抔土輟零各異方衣冠贏得葬風雨鵲鵲行浩劫歸空壤浮生寄渺  
茫玉真圖下髮甲伯勸承匡沅水餘堯女營邱止孟姜君臣今世代甥  
舅即蒸嘗湯沐鄉亭秩家門殿省郎淒涼脂粉磴零落綺羅箱宅枕平  
津巷街通少府牆畫閣偕妯娒曉坐向姑嫜偶語追銅雀無聊問柏梁  
豫游推插柳勝跡是梳妝菡萏鴛鴦扇茱萸鸚鵡觴大庖南膳殿奇卉



北花房煖閣葫蘆錦溫泉豈惹湯雕新獅首炭甜食虎睛糖壯麗成焦  
土榛蕪拱白楊塵游鷄鵲觀苔沒闢鷄坊荀灌心惆悵秦休志激昂崩  
城身竟隕填海願難償命也知奚憾天乎數不臧累歎床簀語即寢  
園傍丰體先從父遺骸始見娘黃泉母子痛白骨弟兄殤夙昔銅鈇泣  
諸陵石馬荒三年修苻藻一飯奠蒿邱寒食重來路新阡宿草長溪田  
廷黍稼隴笛卧牛羊朽壤穿螻蟻驚沙起鵲鵲病樗眠廢社衰草折寒  
塘列剎皇姑寺馱經內道場侍鬟稱練小像刻沉香玉座懸珠帳金  
支渡法航少兒添畫燭保娘伴帷堂露溼丹楓冷星稀青鳥翔幡旌晨  
隱隱鈴鉦夜鏘鏘控犀攀龍馭驂麟謁帝閭靈妃歌縹渺神女笑徜徉  
苦霧迷槐市雌霓繕建章歸御恩五廟涉漠淚三湘柔福何慚宋平陽  
可佐唐虞淵瞻返日蒿里叫飛霜自古遣兵擾偏嗟擁樹傍魯元馳孔  
亟羊季負倉黃漂泊悲臨海包含恥溧陽本朝端闔閭設制滕若壘處

順敦恭儉時危值紀綱英聲起北海雅操過東鄉新野墳松直招祇祠  
柏蒼薤歌雖慘澹汗簡自輝煌謚號千秋定銘旌百旗彰秦肅吹斷續  
楚挽哭滄浪

盧岐嶷

長泰盧岐嶷嘉靖甲辰進士終貴州按察使初為戶部郎與汪道昆同  
舍有遺脂香油於汪者汪問在古何云岐嶷曰唐人謝賜口脂豆澡此  
二物也宴席有糖獅象復問於古何云曰漢光武禁貌糖不許高大此  
是矣

王九思謝榛表宗道

鄆縣王九思漢陂集自序曰余始為翰林時詩學靡麗文體萎弱其後  
德涵獻吉導予習其易焉獻吉改正予詩者稿今尚在也而文由德涵  
改正者尤易然亦獨余也惟仲默諸君子亦二先生有以發之顧予頑

鈍不能勉副其意故今老且朽矣而於所習詩若文者竟亦無所得焉是則可恨也

謝榛詩家直說曰作詩勿自滿若識者詆訶則易之雖盛唐名家亦有罅隙所謂瑜不掩瑕是也已成家數有疵易露家數未成有疵難評袁宗道曰時有古今詩言亦有古今今人所詭為奇字異句安知非古之街談巷語耶方言謂楚人稱好曰党稱慧曰誦稱跳曰跼稱取曰從予生長楚國未聞此言今語異古此亦一証故史記五帝三王紀改古語從今字者多甚疇改為誰俾為使格姦為至姦厥田厥賦為其田其賦不可勝紀左氏去古不遠然傳中字句未嘗肖書也司馬去左亦不遠然史記句字亦未嘗肖左也今日逆數前漢不知幾千年遠矣自司馬不能同于左氏而今日乃欲兼同司馬不亦謬乎空同諸文尚多已意紀事述情往往偏其真尤可取者地名官銜俱因時制今却嫌時制

不文取秦漢名銜以文之觀者若不檢一統志幾不識為何鄉貫矣且  
文之佳惡不在地名官銜也

### 失婢詩

楊李陳詩教和唐人失婢詩集句楚客停橈欲問誰顧况流鶯上下燕  
參差李商隱春樓不閉歲幾鎖韓翎長路多逢輕薄兒耿漳應為能歌  
繫仙席鄭谷尺緣幽恨在新詩步非煙今朝繞郭花容徧李涉別有傳  
心事豈知白居易

### 廣孝錄

邑人周珽青羊善畫葡萄晚輯廣孝錄若干卷弘光乙酉夏疾篤夢人  
語以待廣孝錄成遂蘇亂時失其二卷後年卒

### 續哀江南賦

嘉興沈世涵作續哀江南賦有序

粵以甲申之三月盜弄乾樞神器無主帝既醉於鈞天人或腥於龜幕  
中興道銷窮於三擅厄運之極古今未有歌臺走麋鹿之跡過市盡斃  
鉗之客晨看旅鴈辭玉塞而凝雲夜等銅仙望秋城而泣雨昔士衡入  
洛之日仲宣登樓之年並在亂離咸有著述謝朓釣渚之賦思江海之  
無波潘岳關中之詩時憫荆榛之載道雖復輶輪浣女步嬋嬋人盛衰  
之感同斯來軫誰非秦地空想桃花詎有商岩遙尋芝草冰魚未絕徒  
懷挾之心蟄燕猶蘇不謝雕梁之憶鏡鎖既沉木葉再落興言往吊  
追賦斯篇日月如馳人間何世夷門日令魏市成墟易水風悲秦筑罷  
擊惟雪衣之委羽曾侍先皇若供奉之捐生堪羞朝士兼年累日悵切  
南冠飲恨吞聲私修漢臘薄羹秋滿柳箭春搖恐菊水無延歲之方桑  
滄非可俟之晷夫霸孫啟祚尚揚赤壁之靈弱宋遺都猶報朱仙之捷  
亦各控帶數州綱紀百載豈有蘆花荻葉竟浦浮江代馬胡騶凌波瀚

水鳥孫千騎控淮水而鳴弦翟泉雙鵝指吳都而扇翼五陵冠鳥遊矣  
華風萬里縵縵此焉戎俗二三俊乂徒懷死衛乘輿之誠百萬義師竟  
少固我藩籬之具豈昔之龍盤虎踞者佳氣盡於此耶是知崖山執節  
終靡信國之旗大海揚波必復張侯之艇天意人事不侖臨風喟愴者  
已世涵山雌辨色將遠謝乎樊籠爰居避風曾何情乎鐘鼓豈希黃絹  
之題聊比婆緯之恤文博之枕流漱石竊有志焉子山之垂露涌泉瞠  
乎後也賦曰臨江皋以四望兮氣紆結而懷憂伊天步之艱難兮神恍  
恍而凝愁昔高后之作京兮寶祚上於鍾丘控方塘之白水兮枕震澤  
之清流封狼胥以為鎮兮琛沒羽而為州湛虛宵飛而吳定兮樓船朝  
濟而漢謳數軍寶於長洲之苑饗戎旅於武昌之樓黃旗雨轉紫蓋雲  
浮剪桐珪以錫燕更奕葉而遷幽於樂都之麗康兮乃陪服於南留華  
實偏野紅粟方舟引陂泉而滋灌注兮指翼軫而帶女牛厯三百而無

事兮不識夫蛟函之與鸞鑊雖有祿被之媒孽崔蒲之嘯聚不旋踵而夷囚於是士女游冶族姓繁富玉樹挺於王謝朱輪併於顧陸老成奕世典型以續銘勒燕然旌懸月窟烽火息於瀕陽兮貢葡萄與天馬時既泰而將屯人娛安而忘苦家築夏后之臺戶涉周王之園烏轉迭歌花穠雪舞風流清談而衺名卿尹黨鉤而造禍武帳絕韜於龍豹文絃罷奏於鄒魯腥鮑爛而是求兮白馬沉而何補既而燕厦將焚魚鼎日沸閭左有揭竿之呼嚴關無折柳之蔽天子方復端門而御平臺召百官而延多士期弱草之凌勁風假乖螭以行淫雨請纓則終軍彈劍則馬武出玉關而論兵晏蘭池而旁午空杼柚於二東兮猶呼庚而未止爾乃宮鳴之野雉星落天狐夏箭不能殪仙芝之靈秦鉄不能禁驪山之徒彼小醜之馮陵固蔓延而滋多逞其鴟梟之性鼓其鯨鯢之潯野煙炊斷白骨丘枯一二秉鈞握樞之佐方留賊以自固曾莫肯兮焦慮

而殷圖墨史熬其膏殘兵密於篋啓喜吹熾射牙橫厲黃巾大呼銅馬  
如蟻戰已及於觀門羣工猶侯第而夜嬉橋山之弓不歸茂陵之盤日  
出草木為之飲血神人於焉憤涕江表藉司馬之靈奉神皇之徽值  
天地之雖判畫江淮而宅鼎四海喁喁臻響疊影咏南音之顧懷兮顧  
觀中興而昭淑景帝不悔亡淫荒是逞金鞭未收於傳舍鐵杖已投於  
晏寢方探佳麗以寶椒宮構迎風以連結時元宰無東山之望牧伯非  
睢陽之擬第鼠首而蠅營矣恣苞苴而成水火地坼天崩鼓卧旗仆鬼  
同謀於曹社帝辭錫以秦土翳上將之披猖各飛揚而跋扈既主器之  
沉淪乃不恥乎降北單于置酒而長圍截橫江而竟渡立焉於吳山之  
巔射麋於蘇臺之滸羨靖國之捐軀獨名存而福酷爰有河橋魏將之  
符關路田文之客拭玉張旃尋盟許國思坐觀於時變亮國仇而莫塞  
青龍之艦未浮飛燕之舟

喟魚甲之潛去聞雀唳而不得聞曹空



懸浙鉤寒色日冉冉而虛逝兮思摹而弗釋亂寃心以為續兮編愁  
苦以為憶吳我逢此厄辰兮刻著志之靡適掩柴簷之荒扉兮浮雲惜  
而送日服綬纓而雅結兮別無虬龍之興蟻蝻於是胡風曉白清笳夜  
驚控弦洞庭之浦枝陣彭蠡之陰餘腥煙散

戈旣揮於漢皋

守無聞於壽春精衛銜石而遇矢文臨夜飛而觸兵曩時冠帶衣履之  
俗莫不輸金繒於穹帳謝簪笄於龍庭遙瞻巫岫極目海陵荒臺月寂  
古樹風平馳鳴春草駭汗芳葵書盡灰於秦劫劍已化於豈城若乃金  
柯霞震瑤葉雲靡別豔姬於楚輕墜寶玦於城隅悲有雍門之瑟客無  
報韓之錐玉笛碎而人往雉表委而身糜溘朝露以同盡積為怨而難  
舒至如李陵窮蕃王行排牆弔影奪魄名隕心愴慙塵尾之刻玉羞鴈  
足之裂纁求牽犬兮故里咏落月兮北梁華懷云覆金穴何常顧白日  
以無色入修夜之不揚若大二京學士五都游子脫畧公卿跌宕文史

驅征馬而不前傷搖風之四起似輕絮之飛驟弱麟之失水鬱青霞  
之奇志獨快抑而誰語況復君涉江波妾溯交湖望子吟而不返兮放  
子去而煩多哀拍留聲於文姬新箏寫恨於羅敷紫臺夢香江南草枯  
感別離之萬狀淒雨散而煙哀更有孤臣危涕烈士墜心屍懸馬革血  
洒乘塵霜張其志日貫其精厲勁節於歲寒守如石之筠貞慕拙下之  
遐躅渺翩翩而結纓彼閨門之殉死實鐵中之錚錚原金陵之始祖蓋  
蕭牆之內起上游懼楚甲之乘天塹遼胡馬之濟十五國之亡忽焉十  
六王之宗不祀漢老想司隸之儀南人望壽皇之址痛麥秀於殷墟泣  
山河之異主朔弓月兮心胆寒朔刀疑雪兮骨肉凜  
於鳳凰之臺鬼火亂於瀟湘之渚蒼雲則七量合圍海潮則三日不至  
歎東舟之已膠何南風之不競雖復割有七澤揚沮三江曾無淝水之  
捷屢效石頭之降河方堅而騎斷揖未擊而雞荒冤霜暑落憤水秋長

傷魂游

天之所廢其何以昌昔天下之一家倚東南之藩籬自付託之庸非舉  
江淮而全棄信辭卿而哀賦分機入洛而榮著聊儻回以娛憂分觀江  
南之變態

補豔骨行及京

至元初江浙平章阿魯只班子婦以亂死歸骨於其鄉西湖北山僧黃  
龍老人作豔骨行事載即在聞臨安雜志中今其辭亡矣嘉善及京補  
之留山中以貽好事者

彩珠天上墜華月掌上珍萬里陰山雪一枝瓊樹春陰山直北飛蓬逐  
海上迤東晴沙蹴烏孫公主戀玉門漢家明妃厭金屋麗人獨立穹廬  
地深閨長養旃裘族名花寶帳白晝寒真香錦幕清夜燠長白山頭瑤  
草暉鴨綠江口蜻蜓飛闕氏妬得泣不得秦王求仙祠未歸朝辭名王  
聘莫卻翁侯婚膏髮明璫潤幄珠暗袖溫門庭設蘭妃壁戶塗椒蕊并

映于飛窓遙中連理簫弄未離秦鵲填初度水一雙翠羽鳴三五金  
波始翠羽金波夜復朝銀笙錦瑟曉連宵吳宮闔草吹香佩魏苑彈碁  
拂畫綃千金舞買青衣笑百琲歌徵小史妖嬌歌豔舞懼不足握槊藏  
鉤戲相促填門車馬多貴臣綠鞵丹韞座上賓記與客語試公子罷就  
婦飲真人盈盈天街北皎皎婆女津一朝歐陽秋風起十萬控弦紫  
電指將軍開府浙江頭夫壻承恩官舍裏携家迢迢入蕭關金僕如抽  
壁玉弓鳳子冠搖碧條脫龍媒羈爇青連環南國徵書棘西園宴賞開  
園中桃李聞春妍湖上清明放鷓鴣天寶馬香過煙岫寺錦帆花出畫橋  
船歸來明月蓮花炬醉照華堂燕子箋夢中小小不知愁畫裏真真自  
起樓紅豈新聲翻感栗青琴素手劈篴篥辟塵龍女拂照骨成姬嫗橫  
波賭射嬌分鑽說感翠爭驍泥古散長夏成陰綠樹好瑤階手種宜男草  
侍兒私語記紅潮入月停煎賀房老玉杯金盃索郎持綺闥珠屏不自

支水晶簫著葡萄夜玳瑁梧桐橘柚時噴啼頻怒重無聊鳳 熊走空  
 相嬌自茲卧起如翻水遂令服食同迴飢初就增城館未整政君翹冰  
 挑雪汁琉璃餗火棗霞漿琥珀盃西池王母數仙書南岳夫人降鳳車  
 鳳車何歲蕤雲璈正杳冥瀛海風冷冷聚窟香烟烟溫明秘器賜東園  
 南方楯甲籠魚軒雪肪紫錦桃花洞玉匣珠襦青鳥幡青鳥青珠照青  
 閨桃花桃浪吊挑箔鴻都道士訪太真上林神君見宛若南枝越鳥啼  
 北風代馬嘶紅顏一旦化旅魂國俗由來重歸國六丁朝煉形三官夜  
 考魄玉棺啟視儼明粧丹唇含笑露幽芳芝焚蕙剪燐蘭新鶴馭螭飛  
 駕鳳麟鎖子九霄煙磨尼五色露金膏百和拾空青錦疊千雙晨寶璐  
 大招遙返塞北山選日發引江南路傾城鞞鞞盡貂蟬導馬緄貅盡鼓  
 簫碧雲車洒神靈雨素奈花香士女髻經梁復經梁渡灤復渡遼遼山  
 望水厓平野屬帳毳廬扶驕馬已矣哉魂歸來雪磧晨寄穴冰天久築

臺風姨掩袂慟月姐湮纓哀服匿承肌  
酪留犂薦乳酪珠琲酬送使繒  
綵賚輿臺黃金千百鎰都護跨驄回